

萬有文庫

第二集七百種

王雲五主編

曝書亭集

(四)

朱彝尊撰

商務印書館發行

萬有文庫

第二集七百種

總編者
王雲五

商務印書館發行

愛
借
使
用

集 亭 書 曝

(四)

撰 尊 彝 朱



空 半 半 官 學 院 書 館

登 錄 號

481

類 號

2528
8003



11810.827
2528



曝書亭集卷第十五

古今詩十四

上章敦牂

同郭三微滿井訪崙公即事二首

郊行方澤外。路轉古城窪。小雨乍潑火。輕風無聚沙。青蓮過橋寺。紅杏隔牆花。一笑遠公在。催停穀觶車。
故人方外侶。謂周處士箕也。往往說支纖。帝里衝風雪。僧廚共米鹽。招魂迷去路。挂壁有殘縑。不待山陽笛。同游淚各霑。

送史館姜君宸英赴包山書局二首

白蠟明經亦可憐。強吟詩卷放歸船。告身許領郎官軸。不藉題名鴈塔前。
莫釐峰下著書臺。十道圖經一室開。破臘梅花遶清夢。勝騎官馬踏霜埃。

送徐處士善南還

玉河新柳已堪攀。二月交亭送客還。十度洞庭游未足。今番真住石公山。

送禹鴻臚之洞庭

國家圖書館



004758671

謫官擬就洞庭居。此意沉吟六載餘。君去西峰先相宅。小樓容架滿船書。

送劉進士凡知孟縣

百里雷封古孟州。銅章出宰最風流。一灣清濟通王屋。千樹穠花繞縣樓。別後酒鎗攜伴去。到來詩卷許吾酬。三年報最尋常事。腰折眉摧不用愁。

送人宰順德

銅章再綰出都亭。天末郎官映一星。南海潮連沙嶼白。西樵山壓縣樓青。題詩定遍篔簹竹。判牘憑移孔雀屏。此地不難先奏最。因風爲報遠人聽。

贈張叟昭

笏籜爲冠大布裙。愛從金石拓遺文。吾生癖似劉原父。當代楊南仲是君。

裂帛湖

裂帛湖流兩岸平。柳陰風煖燕飛輕。年光冷笑長安客。開遍山桃不出城。

查上舍慎行弟將南還過寓舍話別同魏二坤小飲賦六言

江郎南浦欲別。小謝西陵未來。謂嗣稟弟也。細草巴溝乍綠。堅冰潞水寧開。散翻李邵新格。酒瀉烏巾舊醅。款語且留十日。看花同上豐臺。

積雨寄賀秀才

堂坳階面簇青莎。鳩婦呼來又出窠。說與江南賀梅子。今年暑雨者邊多。

倪博士我端讀書城西雨中寄之二首

黑龍潭口水雲腥。黃紙無勞畫丙丁。料得林扉昏掩處。高荷大芋枕邊聽。
雨氣西山黯未開。更聞小暑一聲雷。不煩走馬衝泥苦。便可乘船入市回。

牽牛花十二韻

小草無心蔓。疎籬到處延。涼分銀漢水。曉映碧羅天。絆地三秋早。含苞七夕先。風吹長裊裊。露洗更娟娟。
冷翠蕉林外。新黃豆葉邊。日高翻自斂。夜久愈生妍。月影銷衣後。蟲聲攪夢前。捎溝香驛路。墮雨滴罨船。
螢火黏常濕。蛛絲密易緣。子多拋藥臼。根不費花錢。舊入桐君錄。宜蓂織女鈿。憑誰描竹尾。幽思轉翛然。

同李中允澄中錢中允金甫李諭德鎧重過萬柳堂有懷相國馮公二首

岸柳經秋臥。簷花過雨摧。應門人已換。並馬客重來。板屋分熊檻。莎亭擾雉媒。昔年觴詠日。不記暮笳催。
樹改平泉譜。堂仍右相名。路迴逢石坐。心怯過橋行。稚子喧碁局。園官却酒鎗。惟餘沙面水。猶似冶源清。

題汪祭酒黼詩卷三首

金馬紛紛著作家。緇塵日日走篋車。誰如國子先生暇。吟到棠梨日影斜。

西陵十子流派別。南宋諸公體製殊。絕似韋郎浣花集。奇章麗則近來無。

庭闈眷戀賦歸難。酒伴相逢強自寬。只合宅西添小閣。秋山且當故園看。

祭酒詩卷中有記得年時重九日全家登閣看秋山之句。

秋日集馮檢討齋分韻得南字

畢卓能轟飲。康駢愛劇譚。長筵遮硯北。小徑闢花南。榼釀三升酒。齋香二寸柑。餘酣留未去。采菊入茶籃。

題周編修金然雲松雪瀑圖

編修與予有結鄰洞庭山之約。

越縑八尺誰所畫。雪瀑亂灑長松梢。中有科頭人。獨坐盤石坳。注目一疋練。百泉一勺聽。斯人豈宜在巖壑。或者避俗憎喧譁。我生山水性夙嗜。十年誤把田園拋。移家欲果洞庭約。擬先縛屋三重茅。毛公壇高踏月上。靈威洞古探書鈔。楊梅滿村鶴頂賤。橘柚落樹筠籠包。茲山從無蛇虎雉。但有魚蟹鰕登庖。雨前茶牙舌比雀。籬下竹筍頭如貓。閒房恣意任選擇。樂土不用分肥磽。先生方充記言史。朶殿直入穿雲旂。日歸正恐歸未得。磨錢枉費占羲爻。耕田定須沮溺耦。開徑可少求羊交。終當乞取鑑湖曲。庶免怨鶴驚猿嘲。

皇仁綏遠詩八首并序

臣聞柔遠人則四方歸。有常德而六師整。舞兩階之干羽。至誠感神。受百祿於共球。敷奏其勇。周官分職。合方訓方懷方。王會開圖。比服要服。荒服。唐著歸忠之傳。漢歌樂德之詩。矧夫百王之所未臣。重譯於焉。

來附于疆于理。無貳無虞。宜有頌聲。用揚盛美。欽惟我皇上。軼堯包舜。揚武觀文。陟禹迹而方行。合軒符而在握。秦階協正。被四表以光華。上治咸和。躋八紘於仁壽。建中立極。無外恢圖。天地之大德曰生。靡一物不懷帝德。神人之所助者順。允率士莫非王臣。畫謀造化之先。制勝霄旻之上。乃喀爾喀。雖修職貢。反側靡常。與厄魯特。妄搆兵端。阨窮已甚。皇上湛恩溥博。克全仁濡。義育之中。睿慮周詳。不遺曲成。範圍之內。謂外藩之豫附。必親定其機宜。總七萃於黃圖。勒五營於紫微。礪水潮河以北。照耀戈鋌。空同祝栗之間。扶攜老幼。百重陞戟。瞻帳殿而傾心。千列周廬。覲天顏而稽首。宸衷用豫。聖度誠弘。載揚正正之旗。徐布堂堂之陣。有爵有階。有秩推亡。固存賜衣。賜譙。賜金式歌且舞。申以河山之誓。親同禁衛之軍。而又躬莅營門。特宣誥誡。用賞用罰。是訓是行。永爲不侵不叛之臣。無異寶畝實籍之地。於是揚葭啓路。總駟回鑾。百千萬人。皆感恩而泣下。四十九部。益慕義而歡騰。蒼龍搖旆旆之旂。朱鷺疊淵淵之鼓。歲旱而雨師灑道。日長而風伯清塵。曜乾文闡坤珍。調玉燭輝金鏡。旣膺寶籙。宜薦鴻稱。惟至德之彌謙。而覃厚者多益。萬年有道。千古未聞。臣幸際昌辰。式觀醲化。自慚舛陋。仰沐崇深。恭賦短章。奉揚駿烈。紫禁開魚鑰。青郊建羽旄。受降資廟略。載筆忝詞曹。塞拓漁陽遠。山盤虎北高。羣臣歸燕息。轉念聖躬勞。鴈路緣沙磧。魚雲接幔城。鳴鑾七校從。吹笛六軍行。俗本通鞮譯。人今息戰爭。紛紛攜老穉。遙望屬車迎。納款陳千帳。班朝式九圍。不圖瞻日角。轉自懾天威。重馬馱金橐。茸裘換錦衣。早知恩賚渥。慕義久先歸。

錫宴原殊禮。官庖出尙方。自來鹽穀少。初得旨甘嘗。位近周青馬。詩呈漢白狼。遠人何以報。齊奉萬年觴。羽衛三千士。龍媒十二閑。載旌平似水。布陣屹如山。膽已寒蕃部。權仍啓聖顏。始知師以律。悔恃七旗屏。繼絕弘新典。疏榮表外藩。河山申信誓。謨訓有恩言。入視金吾仗。來隨白虎旛。自今同尉候。不敢更懷諉。鳳蓋將旋日。重攜所部來。感深翻泣涕。送遠愈徘徊。星野瞻箕足。雲旂戴斗魁。神功一萬禩。駐蹕起層臺。左闕千門曉。南風五月薰。崇牙鏡吹曲。仙仗羽林軍。行健同天德。鳴謙集帝勳。小臣逢盛際。獻頌愧無文。

爲魏上舍題水村第二圖二首

江鄉最好是分湖。紫蟹紅鰕雪色鱸。眯眼塵沙歸未得。倩人重寫水村圖。綠蘋不礙板橋樁。紅葉空堆老樹腔。異日相過任風雨。抽帆直到讀書牕。

燕京郊西雜詠同諸君分賦

十八盤

香山十八盤。盤盤種松柏。惟見獨行僧。稀逢采樵客。

高粱河

高粱寒食時。昔年盛游冶。隔水百重花。長堤兩走馬。

釣臺

儵魚千百頭。湖水二三尺。有時溪雲生。不見釣臺石。

君子城

吾笑石季龍。爾何知好士。羅致山城中。哀哉數君子。

芙蓉殿

雕宮委礪磔。暗粉剝莓落。想見明昌日。芙蓉殿脚開。

黃牛岡

亂石侵花當。奔沙擁樹根。黃牛岡上月。橫笛過前村。

香水院

壤磴接雲根。流泉來樹底。宛轉入僧廚。淙淙鳴不已。

夾山寺

禪枝啼谷鳥。忍草護松關。偶入樵人徑。桃花又一山。

壺山

石壺久已徙。青山仍舊名。去都無一舍。已覺旅塵清。

重光協洽

送吳御史震方還里二首

去年兮上書。拜手兮青蒲。今春兮未暮。乘白駒兮下通潞。酌酒兮臨風。攬子袂兮城東。申之兮款曲。客無爲兮忽忽。泛牖河兮千里。不如子之車兮。莫或敢柅。望江關兮兩旗。不如子之馬兮。莫或敢維。囊無一物兮。旋故土。將津吏兮無怒。

瞻衡宇兮欣欣。數鄉樹兮歷歷。慰慈母兮倚閭。御輕軒兮布席。妾埽蠶兮臂筐。童呼牛兮腰笛。麥秋兮梅暑。煙舟兮雨屐。罷遠遊兮屈平。師近遊兮束皙。逝將歸兮由拳。樂與子兮晨夕。

雨中酬王先生士禎早春見過韻

架插圖書卽是家。忍令丘壑廢京華。故人積雨能來否。堂下羅生十樣花。

附正月上旬過朱竹垞太史齋中諸花盛開賦絕句

濟南王士禎

馬塍曾說野人家。每先去聲東皇管物華。今歲長安霜雪少。試燈風裏見唐花。

團谿歌寄題黃贊善與堅書屋

團谿水繞舍北流。團谿花發牆東稠。先生歸去著書便。日坐團谿溪上樓。

九日萬柳堂同譚十一表兄瓊作三首

百尺金臺近可攀。城西積翠冷孱顏。自緣筋力新來倦。九日聊尋一簣山。

鷓鴣撲鹿起晴沙。路轉平岡日已斜。較是今年籬菊晚。秋深猶膩水蒨花。
改席疏林脫帽多。半酣猶望麴車過。休嘲酒戶年來減。勸客還能卷白波。

秋水十韻

郭外湖新漲。天邊暑乍歸。牽簷移荻岸。繫纜到柴扉。橋影中流小。人煙極浦稀。
家家采菱角。處處落蓮衣。渡口迷村店。潮痕驗釣磯。魚標林際短。蟹火夜深微。
柳近浮萍埽。楓兼斷葦飛。避矰鴻鴈下。侵壟稻梁肥。夢穩扁舟在。鄉遙舊雨非。
殷勤報鷗鳥。伴我共忘機。

送蔡中允假還省親

記聽句臚已十年。詞頭草罷擘宮箋。不知才子循陔後。鎖院何人下水船。

寄題張學士英前輩賜金園二首

金海橋西小苑灣。偶辭賜第放船還。仙居絕勝閭丘遠。割取龍眠一半山。
越溪漁客東歸後。千載無人乞鑑湖。輸與先生賜金換。君恩歲歲答魚租。

毛封公壽詩集唐人句十韻

自知清淨好。名利本來疎。嗜酒晉山簡。通經漢仲舒。高齋徵學問。教子但詩書。
庭養沖天鶴。香消蠹字魚。寧知武陵趣。還傍釣臺居。散帙至棲鳥。鳴榔聞夜漁。
古苔生迳地。時菊覆清渠。洞有仙人籙。門停長者車。

桐江秋信早。勾漏藥成初。自有延年術。何人更得如。

寄題新城王上舍啓深園居十二首

綠蘿書屋

女蘿青裊裊。壓君一丈牆。有時風卷幔。瑣碎涼月光。留照牀上書。籤帙生微黃。

嘯臺

山月出漸高。山泉鳴不已。登臺一舒嘯。四面林風起。公子鸞鶴羣。形神兩無累。

春草池

春水既已綠。春柳亦已青。此時池上草。日暖飛蜻蜓。游絲墮復起。牆外花冥冥。

石丈

種橘號作奴。種花呼作后。山礬以爲兄。海棠以爲友。羅置石丈前。丈應開笑口。

大椿軒

大椿本無樹。取以名其軒。不隨薺草彫。長愛藻景暄。因思漆園叟。十九皆寓言。

小華子岡

小水波淪漣。小山石偃仄。月明攜客上。竹樹風不息。比似輞川圖。但著淺絳色。

石帆亭

我昔鏡湖曲。會對石帆山。婀娜層雲外。迢迢不可攀。何如一片影。移置戶庭間。

三峯

一峯竦中央。兩峯旁夾侍。共此一簣山。各具千仞勢。要知主人心。方蓬有遐寄。

雙松書塢

我願身爲鶴。巢君庭際松。清風吹我衣。明月照我容。與君歲寒約。寤語縣春冬。

樵唱軒

樵風遠更聞。樵唱行無次。郭東郭西樵。審音非一致。寫入丘中琴。泠泠有餘思。

小善卷

洞戶雖言小。翻勝陽羨里。初無鹽米堆。惟有木石几。不知經幾年。石髓滴爲水。

半偈閣

小梯上橫閣。勝境同精廬。宴坐維摩椅。織塵都埽除。觀心默無語。想見天地初。

題沈上舍洞庭移居圖六首

沈郎歸興及秋風。擬學煙波笠澤翁。不戀湖莊收紫茜。愛他千樹洞庭紅。

銷夏灣頭五月涼。堂成面面納湖光。楊梅綫紫枇杷白。買斷閒園自在嘗。
才微歲晚畏譏彈。井社年來欲住難。只合全家太湖去。免教小吏侮鄉官。
洞府曾傳第九天。況聞菴裏足良田。煩君俟我鮎魚口。並載吳江赤馬船。
濕銀三萬六千頃。兩點青螺髻子濃。生怕東山鷺鴨鬧。輕帆徑度莫釐峰。
橘田薑棧散租符。西舍東鄰興不孤。他日相逢王潑墨。也攀生絹索橫圖。

曝書亭集卷第十六

古今詩十五

玄默涪灘

出都王山人畫山水送別

王郎五載一相逢。寫出雲巒別思重。髣髴攝山風月夜。秋牕同聽六朝松。

白草屯

白草屯空似戰場。昏鴉點點入斜陽。舟依茅屋三間泊。風動棗花四月香。去國不禁頻徙倚。得歸寧復倦津梁。叢祠何處喧村社。有底紛紛士女忙。

入汴過胡司臬介祉

吳船千里載冬醕。避暑長筵日日開。却喜訟庭留牘少。時看官馬借書來。

瓜步留贈張同知

柴車一出白頭還。過嬾偏宜應接閒。猶有故人能好事。隔江留看六朝山。

寄陸侍御隴其

古今詩 十五

主恩先後逐臣還。羨爾幽棲柳一灣。想得著書風幔底。桂花如霰落秋山。

洞霄宮題壁

天柱峯高倚晚晴。琳宮消歇斷碑橫。砂牀竹下搜難得。臥聽山禽擣藥聲。

江行三首

潮落江平宿富陽。船頭新月下微霜。曉看烏白紅千樹。樹杪半山鴨腳黃。
絕壁苔紋鼠尾皴。灘光晝靜白鎔銀。分明江上孤篷客。黃鶴山樵畫裏人。
環溪亭下水流東。野碓飛輪到面風。返景松巖紅未斂。隔江人語漆林中。

冬日同鹿明府祐錢廣文瑞徵游爛柯山二十韻

道書詮洞天。青霞居第八。流傳負薪翁。披榛入塊圯。中有兩青童。棊聲暗相嘖。俄驚斧柯爛。逝節等奔鶻。
此事知有無。特書在琳札。我來太末墟。十月方納結。曉出通仙門。緣溪碎石滑。拂林風騷騷。鳴碓水泚泚。
明府政不煩。廣文俗能拔。於焉齊喚渡。次第梶車轄。飛梁忽在望。相視笑且咀。靈境茲最奇。造物亦太黠。
疑經百蟲焚。或受五丁掘。連蜷虹霓偃。垢膩神鬼刮。傾崖穿一綫。斷塔盤禿髻。丹楓露已彫。瑤草霜未殺。
剝苔讀遺碑。汲井恣拭刷。昔賢鬪茶地。昧者莫之察。日斜洗行廚。得食鳥嘎嘎。徘徊雙松陰。惆悵別香刹。

鹿鳴山晚眺二首

一簣山平遠。雙林逕暗通。不愁筋力倦。且喜笑言同。藉草荒岡上。疏泉碎石中。新晴尤可戀。移席憤王宮。
近郭茲山好。禪扉鎮日扃。江光寒轉白。峯色遠逾青。亟種千松樹。宜添一草亭。他時放歸櫂。歌鳥試重聽。

玉山

三衢山歷盡。橋影跨通波。十室居城少。千家負郭多。啓顏津市酒。隨意榜人歌。且免書驢券。郵籤次第過。

廣信

信州風物好。倦旅亦開顏。灘響層層石。林疎面面山。狎鷗飛不去。放犢飲初還。夜火浮橋外。連船當戶櫺。

鉛山

不遠江城路。舟師指點遲。穴山巢鸛鵲。編竹坐鸕鷀。晚飯惟三板。朝醒藉一甌。鵝湖酬和地。百世起人思。

弋陽

城小斜依壁。門開近面江。陂仍仙令跡。歌換楚人腔。辣關山無樹。崢嶸石滿瀧。多情甌塔影。十里逐蓬牕。

貴溪

亭榭均干越。封圻析上饒。連山齊覆釜。獨石忽成橋。想見黃梅發。何曾碧樹彫。降丘誰宅此。雞犬已寥寥。

安仁

畫角衝寒動。明星際曉行。水迴沙市曲。山到郭門平。野碓啞啞轉。漁榔杳杳鳴。誰與分百里。洵美得嘉名。

瑞洪

餘干江路永。回首失嶄岳。市酒難為醉。鱖魚乍解饑。自玉山至安仁。捕魚多用烏鬼。魚皆無味。至此始用鱖。湖寬舟愈小。峯遠日初銜。漸識宮亭近。分風及布帆。

白贛州至南安灘行口號二首

鬱孤臺下水嘈嘈。南去輕舟未易操。灘響逆流三百六。篙師那得萬張篙。且挂風帆溯急流。船人勸客莫深愁。只應預想歸程樂。柔櫓嘔啞下吉州。

昭陽作韻

夜泊珠江

潮湧牛欄城門名外。舟停蜚戶旁。月高人寐。隔浦是歌堂。

同屈五大均過五羊觀

仙人騎五羊。墮地化為石。石今在琳觀。仙人去無跡。屈生嗜奇古。偶坐蔭松柏。摩挲汴京碑。不覺日西夕。

觀有建中靖國碑。

光孝寺觀貫休畫羅漢同陳恭尹賦

貫休手寫一十六羅漢。其二乃在南海訶子林。昔游真蹟未得見。念之三十五載縈人心。白頭重作嶺南

客故人期我虞翻宅。僧廊亂後花木猶瓏璵。薤菜春生滿池碧。循廊轉入精廬深。一幅居然挂東壁。古綃
尙白石轉青。恰於石罅安疎櫺。一僧俛首力寫經。自準以下祗半形。芬陀利花貝多葉。椶櫚筆管毛猩猩。
不知金天之西何處得石硯。毋乃昆吾玉切新出礪。一僧却立侍巾餅。靜如沙鷺翹涼汀。牕燈不翦信明
滅。杪樞樹底風泠泠。牕前千歲老猿拱。雙臂平挾兩肩聳。笏鞞桐帽木葉衣。想見霜濃寒到踵。精誠能令
感金石。何況羣生知怖恐。禪月師流傳三絕畫書詩。詩編巨岳集書有姜體。遠本周之史籀秦相斯。未若
畫品更崛奇。卽如此幅遠出意匠表。或疑入定真容髣髴親見之。不然調鉛殺粉能爾爲。訶林僧神物藉
汝能世守。不見宣和舊譜遺蹟久云亡。豫章西山雲堂院中亦何有。我欲賺汝去。莫飲我缸面酒。我欲奪
汝歸。玉鴉叉不在手。世間豈少珊瑚鐵網珍珠船。自今貯之伏梁閣。檻庶可全。

嶺海將歸梁吉士佩蘭載酒邀同屈。大均陳恭尹吳韋王準陳元基梁無技季煊燕集五層樓席
上分賦得會字

飛樓壓高城。人天納萬籟。登臨信可娛。矧與羣彥會。吉士澹蕩人。偕行屏軒蓋。論交半簞笠。雜坐緩巾帶。
樽中酒如泉。海大魚作鱸。款款話別悰。迢迢念歸旆。於焉感昔游。茲樓在晡靄。凝思躡丹梯。興發不可奈。
惟時建雄藩。自比夜郎大。邸中鑿園池。巧匠恣雕繪。水亭擬舟梁。山木徒樅檜。長姣羅美人。管庫斂文具。
因之設厲禁。游者必鉗鉢。一閉金獸鑰。廿年委榛蒼。修蛇穴其中。妖鳥叫其外。雖免劫火焚。終遭颶風害。

人事戒滿盈。天意惡侈汰。六師一以移。漢將齊下瀨。劉王舊花塢。金粉盡淘汰。今來縱游觀。足以動深慨。觴罷復凭闌。遠目豁矇眊。祝融方司南。尉陀臺占兌。萬井鬱參差。百谷互陽昧。人影數沙蟲。林梢亞蓬艾。我非雲中君。何緣出塵蓋。少陵有遺詩。將老斯游最。

嶺外歸舟雜詩十六首

黃木灣西廟鼓搥。春潮漾漾沒蒲芽。翻嫌二月歸程早。一路攀枝未作花。蠻江豆蔻一叢叢。牡蠣牆圍半畝宮。貪看河頭采珠女。輕帆不趁酒旗風。枕外潮雞報二更。朧朧月底暗潮生。客心最喜舟師健。貪趁朝霞半日晴。船頭醞酒佛山過。七尺烏篷疾似梭。行到西南舊時驛。驚心榕樹已無多。三水城樓照落霞。漁村處處見撈鰕。夜來欵乃聽新曲。不是漁家是笛家。飛來寺脚束江濤。徑入雙林磴轉高。怪道褰簾蝴蝶至。軍持新插紫山桃。權郎鄉里面都黔。撐盡筠篙秃指尖。水飯乾魚烏欖豉。生來不食廣州鹽。紫棟花香映水牕。舟從大廟出奔瀧。晚來欲雨猶未雨。峽裏鷓鴣啼一雙。新開花縣壓層巒。羣盜停探赤白丸。不是邵陽王給事。又且涇陽行旅至今難。山坳一水忽分流。兩岸多停楚客舟。夜半東風齊笑語。月明打鼓上連州。

彈子磯高高插天。篷牕未許客安眠。尋常一色四更月。獨有此山啼杜鵑。
曲江門外趁新墟。采石英州畫不如。買得六峰懷袖裏。攜歸好伴玉蟾蜍。
修仁渡接始興江。半挂魔幢半佛幢。記得三楓舊曾泊。更無風雨打船牕。

澹公山水入奇懷。陸守頻營繡佛齋。白社風流今已盡。更誰說法上丹崖。

丹崖精舍表兄陸侯世楷守南

譚堡中崇禎庚辰進士牧臨清州亂後隱於浮屠後卒於平湖

青筍竹尾鳳毛織。銀箸灘頭石角尖。五里一瀧成十里。虛勞估客記郵籤。
雄州郭外萬人家。小店臨流大道斜。纔是野薔薇落後。白花開遍苦丁茶。

梁吉士以羅浮蝴蝶繭二枚贈行曲江道中一蝶先出篷底聯句成三十韻

故人贈我行。方物當所選。彝尊筥發詫駢羅。中有蝴蝶繭。沈名蓀兩兩折枝挂。一一槁葉卷。昆田動搖槌
懸風。妥貼續綴冕。彝尊厥包同米囊。其文比竹篆。名蓀末如蟬翼輕。齊女鬢垂鬢。昆田詩朋爭愛惜。寘之
黃篋箕。彝尊薄寒巾密覆。遲日牕始展。名蓀隔籠頻摩抄。並棹迭窺覷。昆田形隨秋燕蟄。候早春蛹蛻。彝
尊我夢爲莊周。栩栩興匪淺。名蓀俄然一繭破。有若子初婉。昆田停撓疾招呼。急走忘足跣。彝尊煽爛五
采錯的礫。九光爨。名蓀層層金泥塗。屑屑雲母碾。昆田絲絲春江濯。幅幅朝霞翦。彝尊孔鸞一毛截。瑇瑁
片甲輒。名蓀眉過粉蛾長。翅類仙鼠扁。昆田縹纁變周官。繪繡備虞典。彝尊曾聞朱明洞。大者如輪轉。名

葆悠揚千花叢。下上百丈巘。昆田或云麻姑裙。裂之在蒼蘚。彝尊或云葛翁衣。貯之在丹甌。名葆紛綸辭各異。無乃傳者舛。昆田夢想四百峰。有約末由踐。彝尊未逢采雀靈。徒說啞虎善。名葆名山應見笑。竦誚豈能免。昆田覩茲鳳凰子。髣髴列仙遣。彝尊入山夫何難。歸與面有覲。名葆明當放汝還。華首恣游衍。昆田

沈霖據石圖

差山高士隱織簾。千金一致醫方兼。餐花黑蛺蝶衣潤。丸藥碧梧桐子黏。無絃之琴石上臥。有洌者水沙中潛。張生遠傳寫陸生嘉淑讚。題罷玉蟾蜍淚霑。

秦吉了聯句

珍禽產邕管。自呼秦吉了。武進邵長蘅子湘。脩脩羽儀澤。炯炯眸子瞭。彝尊丹味漫多智。黃距一何躑。長蘅尾輸山鷓長。形陋么鳳小。商丘宋華牧仲批。肉花冠鼓垂。某蠟光皎。彝尊好語鎮間關。餘音或繚繞。華雖殊鳩舌蠻。偶類雉鳴鷦。彝尊宣和譜乃遺。爾雅釋未表。屢奮躍不停。猶立聲忽悄。華羈栖恣飲啄。簾幕信昏曉。寄身在籠中。結思仍木杪。長蘅稟質洵云微。卽物慨詎少。所以韓退之。作賦感二鳥。彝尊

關逢閣茂

曉行圖

樹杪星星塔火收。月殘衣上冷霜浮。郎當風鐸穿林去。莫是曉行人姓劉。宋劉一止賦曉行詞得名人號爲劉曉行

白陽山人陳括折枝花

餅桃花仿吳公器。風牡丹摹崔子西。雨點露團猶在眼。惜無好鳥盡情啼。

崑山謁宋劉處士過墓

荒榛斷碣小山陲。詞客當年亦可悲。蘆葉汀洲繫船夜。曉肩風雨渡江時。橐中青兕千金散。馬後焦桐一轡隨。辛苦東吳顧文學。湄邀人歲歲此題詩。

積雨八首

自從甲子春來雨。四月從無三日晴。薄暮東風吹轉急。泊舟小水看潮生。水木陰陰夏尙寒。桑枝風戾幾曾乾。莫愁著屐衝泥遠。小舫撐過繡鴨灘。沒盡荷花紫草田。菱池新水芋陂連。畏寒不獨衰翁甚。年少冬衣未拆縣。貓頭筍夾白版扉。麕眼籬綻黃薔薇。綠陰門巷午風起。吹遍楊花總不飛。烏篷夜拄釣船坊。曉起水添三尺強。欲覓園花查上舍。嗣堞但愁橫漲板橋妨。荷葉新抽一丈莖。柴門趙漲到磯平。黃鸝粉蝶不相見。唯聽鶉鳩逐婦聲。芍藥醪醑不到餅。園荒六枳戶常扃。吳蠶已是三眠候。桑葉依然陌上青。

棟花信後猶凝紫。梅子枝頭尙未黃。枉費祈晴丙丁帖。殺風雨至轉顛狂。

池上編籬偶成二首

槐泚菱池水一窪。好編六枳作籬笆。客來與乞平安竹。老去思栽頃刻花。農丈人唯知避俗。村夫子更嬾移家。試添隔岸香茅屋。眼見南垞勝北垞。清時特地許閒身。底用湫囂傍市塵。著錄九經堪送老。擁書萬卷不言貧。爲農也解量晴雨。置酒渾忘是主賓。寄語巖栖譚給事。瓊何妨近作耦耕人。

題畫

第四橋頭楓葉丹。詩翁露頂不知寒。停車鎮日樹根坐。閒看鷺鷥飛過灘。

爲高上舍題其尊人太常層雲山水軸

太常三絕畫書詩。尺幅溪山付虎兒。斷楮零綃何處覓。秋牕惆悵卷還時。

李秀才琪枝墨竹

小閣爐香洗硯初。數竿墨竹最清疎。前身定是梅花衲。仍占春波橋外居。

送鄭公培入粵

入閩閩有灘。度嶺嶺有關。勸君舍仙霞。勸君躡常山。一帆餘干漾。三板茶磨盤。曲江水泔泔。大廟峽攢攢。

秋深高涼郡。郡守鄭君當之官。英英玉堂彥。戟舍有餘閒。好賢若緇衣。爲子具館餐。況有大王令。原儒雅足盤桓。蕉椰實堪飽。橄欖漿不酸。一丈孔雀尾。雙丫公孫蘭。青青篔簹竹。恒覆屋數間。此鄉洵可樂。何時方來還。暇過五羊城。越臺尤壯觀。番番三老友。謂梁陳三子爲我報平安。

招陳秀才枕山游之作

洗藥爰基井。讀書顧況臺。溪行十里近。風便一帆開。野飯香新栗。山園露早梅。相邀好兄弟。及此共深杯。

旃蒙大淵獻

二十月二日

灣頭新柳碧遙遙。猶記停舟舊板橋。一自花時葬西子。年年風雨是今朝。

論畫和宋中丞十二首

阿儂舊住韭溪北。天籟閣中曾數過。記得千金紈扇冊。童時一日幾摩挲。項氏家藏千金帖有三。一爲唐

帖初拓本。一爲唐宋人畫紈扇居多。

界畫樓臺膽未豨。棘鍼花鳥亦難嫻。昔賢往往妙遊戲。不了樹枝沒骨山。狡僧紛紛僞亂真。巧勻楮墨傅灰塵。誰知神物歸藏弄。千載依然色斬新。談藝何人公道存。每因憎愛昧昭昏。不應唐沈同時在。吳偉翻呼畫狀元。

隱君趙左僧珂雪。每替容臺應接忙。涇渭淄澠終有別。漫因題字槩收藏。董文敏疲于應酬。每倩趙文度及雪公代筆。親為書款。

胥山樵叟畫亦殊。得錢多寡分精麁。少年身後休嗤點。不見長江萬里圖。項叟聖謨。子京之孫。自號胥山樵。曹侍郎溶。領藩東粵。叟作長江萬里圖送行。深得古人筆法。

崔子忠陳洪綬。人物最瓌奇。仕女天然窈窕姿。弟子描摹失師法。盡調鉛粉畫東施。

王五崇節谿山擅平遠。周郎之恆窠石亦清真。兩君人物兼臻妙。未許南人笑北人。王宛平人。周臨清人。

巨幅鸞鳳細草蟲。長留風露溼花叢。時人罕覩藕漁筆。止說王郎武憚老壽平工。王長洲人。憚武進人。

先子韶年寫雲壑。當時心折董尙書。後來舍弟亦能畫。可惜都無片紙儲。先母唐孺人。董文敏之甥也。文敏見先人畫。謂人曰。不出十年。可以亂吾真矣。舍弟

鼻鑿能詩畫早卒。

白下錢唐畫作林。殘山剩水樹無陰。若令此輩流傳遠。不合良工苦用心。

退翁孫侍郎承澤倦叟曹侍郎溶嗟淪沒。吳客雌黃詎可憑。妙鑿誰能別苗髮。一時難得兩中丞。謂宋公暨闕撫卞公也。

答徐舍人永寧上舍永宣五十韻

罷官臥荒村。戶外可羅雀。秋風攪庭梧。意況劇蕭索。凌晨屋山頭。爭噪兩乾鵲。須臾名利來。有客款門闕。披衣出迎客。矯若雲中鶴。南州名父子。文采何照灼。往偕副都公。同聽清禁鑰。神羊冠獨峨。虎僕毫載橐。正色立朝端。吐論譽而謬。但為鳳回翔。不事鷓擊搏。循陔請終養。忠孝兩無怍。俄焉梁木壞。吾黨失矩矱。

僉云令嗣賢。翰墨麗金牒。茲焉接丰采。心路快一淪。索文表墓道。於義無可卻。昔人重碑版。論文不論爵。後來世俗愚。但取官顯燦。縱然頭銜長。往往詞冗弱。鉅公卽能之。亦復多僞託。誰歟辨真贋。止解速鑄鑿。遂令賢達人。罕載金石略。稽古墓銘工。昌黎最凌連。柳李揚餘波。屹立鼎鎗脚。穆修行流派。十子表東洛。文公成公後。軌範漸刊落。姑蘇王止仲作墓銘舉例於唐取三家韓柳暨李習之於宋取十家歐陽永叔尹師魯曾子固蘇子瞻王介甫陳無已黃魯直晁无咎陳了翁於南渡取二家朱仲晦呂伯恭也黃鐘屏弗考。細響賞牛鐸。凡聳互標榜。羊豹聯一鞞。舉世逐聲聞。孰肯叩寂寞。君家好兄弟。蓄意勤且恪。別來再致書。邀我踐宿諾。各賦詩一章。體製極雄博。纏繇思無盡。繹繹絲在篋。參差瓊樹枝。爛漫棠棣萼。神鷹乍脫鞵。天馬初卸絡。書蹤逼褚薛。句法壓盧駱。珍物貽頻仍。一一刮眼膜。香杭包綠蒲。芥片裹青箬。駝駝軟勝綿。翠織暖逾貉。異錦掉鯨魚。明燈綴珠箔。愧乏英瓊瑤。何以報金錯。緬惟副都公。九京不可作。吾衰筆力短。兼苦文思涸。盛美豈勝書。經月橐乃削。雖非黃絹辭。陳言務掃掠。以之勒豐碑。觀者或摹拓。采撫入琬琰。異日上史閣。庶幾身後名。藉以慰冥漠。春山采茶候。風煙想一壑。當浮太湖船。直抵洮滬泊。一登君子堂。歡言共絃酌。

喬孝廉崇烈居父喪每泣則庭烏盡下禹鴻臚爲畫餉烏圖率題三首

烏烏啞啞東西樹。子得食兮哺其父。于思于思淚如注。惜烏尙有反哺時。塊獨煢煢守丘墓。烏烏啞啞樹東西。迴翔下上不得棲。飢來肯啄庭中泥。日食孝子一溢米。聖廬共爾長悲啼。

烏烏啞啞尾畢逋。誰其傳寫禹鴻臚。張徐王趙世所無。天哀孝子降黃玉。留此作配雌雄圖。

雨舟聯句

山行未淹旬。日歸歲已晏。徐江徐鉉電發晨發菴東西。疾風吹四面。彝尊俄頃雲溟濛。急雨雜飛霰。鉉寒木聲怒號。衝波勢撒旋。彝尊舟師劃柔櫓。迸力與水戰。鉉有如士先登。賈勇色不變。彝尊重湖乍超越。小舫乃利便。鉉回看澚山橋。亭亭樹葱蒨。彝尊沿流泝木瀆。峰頂豁僧院。鉉鈴傳越來溪。屣響吳別殿。彝尊陳跡且莫悲。執友情所眷。鉉將尋二棄堂。葉寶應燮營別業橫塘二棄其齋名也庶幾共游衍。彝尊詎期冬潦收。水淺石盡見。鉉舟膠不能前。我躁子煩悁。彝尊聯吟倚篷牕。翦燭炙冰硯。鉉安得胥口潮。盤椒及家宴。彝尊

曝書亭集卷第十七

古今詩十六

柔兆困敦

耳疾示王周二上舍

我齒未七十。恆苦兩耳充。患此已三年。入秋輒內訐。始焉輪濕濕。既乃氣熾熾。牀下駭鬪牛。門前失吠狨。有如兩豆塞。難使五藥攻。因之日靜坐。物理究初終。是非始聽聞。褒貶將安窮。屬垣第自苦。察察爾何功。讒柄變白黑。治道淆污隆。君子天地閉。小人地天通。世事付一瞶。葆我以太沖。免懼喪匕雷。免驚擲鶴風。人勞我則逸。美疢丁我躬。相法十七家。不容麥者豐。況若封丸泥。寧非富家翁。比鄰有二子。相憐病適同。褒如顧我笑。子論詎發蒙。耳者心之候。其穴名聽宮。其神字幽田。其用在司空。子今勤著書。不異五經筒。有時議紛綸。講席相磨礱。說詩匡丞相。解經戴侍中。無人爲畫字。子將焉折衷。主人作而歎。何術返我聰。客云古方法。社酒能治聾。來朝海燕歸。陌上養社公。伐鼓聲淵淵。割肉飽蓬蓬。吾儕試往祈。泥飲等喝虹。按節舞麗娟。安歌走明童。三人共顧曲。其樂也融融。

初夏重經龍洲道人墓三十二韻

亭亭馬鞍山。產石光瑩瑩。其東勢磬礮。竹柏翠相映。劉生昔栖遲。於焉日吟詠。生耽巖壑幽。死愛水木淨。要知賢達心。義不陷俗穽。一棺抱山阿。勝夾兩婢媵。傾崖屏荆榛。老樹絕鴟鷂。既鮮蕘豎侵。亦免菜畦蝗。乃知斯丘樂。匪藉青烏訂。我思南渡後。思陵失其政。謀夫多去國。魏公執兵柄。幕府盛賓僚。子弟談性命。棄師累十萬。三敗無一勝。肆將功罪淆。第許心術正。猛將反先誅。豈惟一檜橫。哀哉小朝廷。自此和議定。金縉括脂膏。臣妾費辭令。忍忘君父讎。寧計蒼生病。過也大布衣。慨慷本天性。好游或渡江。嗜酒數中聖。議論辛陳間。恥與餘子並。歌詩存十卷。卷卷氣雄勁。靜夜思中原。往往血淚迸。厥後詣闕書。何減諍臣諍。庶幾國士風。合古之儒行。我來百世下。適墓必生敬。三年兩經過。涼燠感時興。番番玉山叟。顧文史廣援證。思復東齋祠。暇日便眺聽。奠以椒桂漿。關此颺颺徑。誰與能好事。率錢表名姓。遺文并雕鏤。足以播遙負。

曝書亭偶然作九首

拓得園基一百弓。閒來樹底逐雞蟲。埽除蝗菜下鷲粟。亟命畦丁修水筒。坵南宜得翠筠看。上番移來近百竿。昨夜疾風吹拔木。老夫差喜竹平安。蜻蜓翅丹蝴蝶黃。白露滿園秋草長。靜聽桑斧斫叢棘。忽露一株巖桂香。蒲萄煎濃注酒餅。酒闌荷葉香滿汀。新涼枕簟不妨設。時有北風吹我亭。

槿花本與佛桑同。也向籬邊吐白紅。試待來年根盡活。編成著色短屏風。
雨裏芭蕉風外楊。水中菡萏岸篔簹。衰翁愛植易生物。不願七年栽豫章。
移橙種橘計蹉跎。一箇茅亭草蔓多。輸與城隅譚給事。花時處處有行窩。
縮版誅茅事偶然。修門此說此亭偏。須知庾信園雖小。詩賦江關獨易傳。
平泉花木遠爭移。金谷繁華盛詠詩。淪落栖遲杜陵叟。何人尙寄草堂貲。

斑魚三十韻

吾衰薄滋味。意不在梁肉。第苦藜藿羹。精力易消縮。以茲盤中饌。往往供水族。持螯疑螾蜉。握鱸近蝸虻。
可怪黿脂垂。生憎蠶尾蠹。所欲庶其魚。又無取乾鱸。河豚昔最嗜。恆用井華漉。塵遠烹於庭。血去抉其目。
刈楚然豆萁。務候湯火熟。瓊乳捋西施。但恨不盈匊。誰能罷饑叔。對此食指搖。自從十年來。不敢恣口腹。
耽毒安可懷。災生慮薄祿。斑魚乃具體。秋深出洄洑。小大雖云殊。一氣同化育。其形亦彭亨。其性齊忿愾。
此時釣魚師。香餌素所畜。篿篿三竹竿。編簿坐踈伏。垂綸飄且弱。沉鉤曲而復。有時十數輩。戢戢歸罟麗。
安砧剖瓜刀。汲水浮柿木。於焉敕中廚。慎勿覆我鉢。排泥剔其羽。起肝淘以麴。法使甘不噉。瑩白類新沐。
和之以蟹胥。其汁轉濃郁。既異齒鏝鏹。兼免愁慘黷。因思膳夫經。珍未窮水陸。設鱸姜侯會。思鱸張翰獨。
俊味恥自饜。有客至不速。亟須問前村。侑以酒一斛。

題汪上舍讀書圖

朝看牧豕助邊儲。暮見爲郎擁傳車。勸爾須拋兔園冊。世間風漢乃耽書。

山陰客舍題高布衣蓴鄉釣師圖二首

蛤蜊菰葉橫塘曲。細雨斜風西塞山。爭似蓴鄉好秋色。輕舟容與水雲間。
愛餐花港雞頭芡。更采湘湖雉尾蓴。踏浪緣流無不可。只休驚起浣紗人。

顧明府培元載酒邀觀三江閘

一舍三江閘。輕舟度幾灣。蕭疎何限樹。平遠不多山。小管聲聲急。深杯戶戶豨。賢侯有高興。未許夕陽還。

壽孟叟

最愛鑑湖好。秋山百里青。君家秋山下。遶屋泉泠泠。黃菊樹百本。翠濤開幾餅。玉顏長可駐。不藉蕊珠經。
贈牧上人

我客柘湖曲。上人來叩關。欲浮清淮浦。直渡黃河灣。霽雪亂塔寺。夕陽平坡山。五茸春草綠。一舸望南還。

強圉赤奮若

萬年藤杖歌贈尤檢討侗

我有天台萬年藤。持贈吳下遂初翁。想當李明柏碩迹未到。此藤久已生山中。偶然拾自金庭宮。攜歸曉

夜但拂拭。重之不異長生桐。翁昔史館文最雄。南狐東馬卓有前賢風。卽如詩篇也。壓蕭范陸。長城笑把。偏師攻。歐陽黃九柳秦七。新詞往往傳歌童。翁今歸來雙耳聰。曆頭六十更二十。顏貌却如四十同。況有才子籍早通。兼珍之膳潔且豐。人生快意亦已足。豈必入海求方蓬。西堂日煖花滿櫳。楊梅漸紫櫻桃紅。翁來期我花下酌。清晨扶杖葑門東。繭紙戢戢抽詩筒。看翁游覽興未窮。水循練瀆山穹窿。長松樹底芝草叢。四方上下與翁逐。杖兮杖兮藉汝功。

寄蘭溪葛廣文

飛菱挽粟各喧闐。散吏何如葛稚川。百斛金華新酒熟。醉尋桐柏觀中眠。

趙贊善以新詩題扇見懷賦答

儲端鎖院各收身。同是承明放逐臣。遠憶音塵千里月。來尋鰕菜五湖春。閒教花底安碁局。笑比紅兒狎酒人。縱說卜居猶未定。幾曾憔悴等靈均。

附原作

益都趙執信

江村水樹澹秋煙。不見幽人思悄然。往接簪裾三殿側。近聯蹤跡五湖前。老爲鶯脰漁翁長。閒上鷗鷖估客船。各有彈文留日下。他時誰作舊聞傳。竹垞在長安著日下舊聞

雨過馮檢討葑水園四首

關成小園在。束皙近游頻。夾巷千花續。編籬六枳勻。葉低斜曳杖。石礙曲勾身。正值黃梅雨。蹒跚著屐人。又見衡門改。新看小閣添。海榴橫濕戶。楚雀近窺簾。曲直分沙溜。參差露塔尖。重過轉瀟灑。村郭意能兼。高柳微風末。新荷驟雨中。竹扉經歲別。茶月一尊同。盡得齊民術。何殊避俗翁。菱田知可拓。小舫後時通。我亦歸田久。開門近水灣。縱移花百本。并少屋三間。對此增惆悵。何緣數往還。煩君暇相過。看積一房山。

仙游茅筆歌酬徐檢討

君不用鐵梳梳秋兔毫。亦不用束青羊毛。別搜凡材逞妙技。鼠鬚虎僕非爾曹。吾聞仙游郭外山最高。仙人九鯉雲中遨。紫鱗三百二十四。白蝦蟆吠黃雞號。有時懸厓忽題科斗字。是豈不律人間操。茅田深深野火燒未盡。樵夫羹豎赤脚騰磽磈。拔茅連茹縛作將指節。六寸之體兼頭尻。桃枝竹罷火熨帖。鹿角菜免膏煎熬。誰與智者剋此物。將毋九何一范授以刻髓之蘆刀。垂虹亭長嗜奇癖。一牀載得還吳臚。分我一管已足豪。當其運腕大稱意。筆頭公喜長堅牢。人生知己隨所遭。良工對之但駭還。足使李展汗走屠希逃。

醜舫卽事二首

破牕風雨濕書籤。睡起明星忽在簷。最喜蛛絲捎竹尾。牽牛花翠曉來添。秋老梧桐葉葉黃。夜來風雨太顛狂。分明了鳥牕深閉。一片何緣墮筆牀。

九月八日滄浪亭懷古二十四韻

滄浪有遺亭。勝蹟今始到。疎籬六枳棧。小徑一僧導。古牆聳寺樓。暗水接官漕。怪石長差肩。平林或妨帽。因而詣北碕。歷歷見房奧。石枰雖無存。宋毛珣滄浪亭詩。濯纓人去水空寒。事屬明時欲問難。日暮客歸園館閉。鷺鷥飛上石棋盤。自注子美故物。惟石枰存。草菴猶可造。中丞我老友。山水敦夙好。於焉翦榛莽。復此濬潭隩。暇日攜賓僚。曾不擁牌纛。春留露輞駐。暑便接羅倒。畚田課耕稼。浦禽恣啄菹。游觀民胥悅。豈弟神所勞。湖州謫司馬。賦才本雄鷲。詩逼梅歐陽。文亦師訓誥。賢相所館甥。孔壬生嫉媚。舉事偶不慎。衆口逞狂譟。故紙錢區區。乃誣名士盜。茲事近千年。識者尙憤懣。哲人貴自勝。林泉遂遐蹈。南陽招不去。止用尺書報。雜花修竹間。風月任嘲傲。斯人洵可懷。曠世我心悼。竭來謁祠屋。思以渚蘋芼。落景溪橋還。商飈遠吹滂。

九日宋中丞招集滄浪亭觀韓滉五牛圖復成二十四韻

中丞埽亭館。邀我百花洲。遂度宛轉橋。罷遶屈曲流。緣溪尋石磴。九日升崇丘。層層樓堞敞。面面禾黍稠。編籬釘圓菊。密坐軒窗幽。同調二三子。清言啓綢繆。樂飲貴適意。豈必量觥籌。邦人許看客。風帽盈牆頭。移時官馬至。畫卷載其尤。示客五牛圖。真氣豁我眸。晉公諳燮理。體物固能優。郭椒丁櫟輩。飲降各自由。宣和購遺蹟。已詫不可求。何期白石爛。此圖翻得留。鷗波趙王孫。重之若琳球。再三跋卷尾。小字工銀鈎。畫已經千春。尙足藏千秋。吾聞五穀言。養民如養牛。善牧臥其背。穩駕百斛舟。驅使但排促。安用施鞅鞬。

味者費三箠。剔黷恆不休。吾公務廉靜。化理臻六州。里仁知斯宅。不處古所羞。逝將歌碩鼠。樂郊可遨遊。
得張舍人宦皖口書却寄

六年不見張右史。忽誦秦游一卷詩。韓孟元劉無定格。尤蕭范陸有餘師。歸逢灤鯽堆盤日。到及江花夾岸時。試計合并何地好。須憑來雁慰相思。

寄賈黃州鯉

近聞南紀賈黃州。到日題詩滿竹樓。畫永清香凝列戟。月明赤壁愛停舟。棘針花鳥真無敵。水墨雲山不易求。別後相思意何限。可能尺幅寄輕郵。

題禹鴻臚統國夫人下馬圖

貌出風姿勝太真。無勞粉翠費千緡。如何南內淋鈴雨。不憶當街下馬人。

又題

當風帶緩舞衣寬。無復宮門驟曉鞍。一事差羸杜陵叟。畫圖恣得近前看。

乍浦

乍浦逼瀛壖。孤城小於甕。居民八九家。僅足追飢凍。邇來弛海禁。伐木運堂棟。排空駕檜巢。近水壓菱葑。陶旌器本窳。橘柚包匪貢。偶然資貿遷。是豈足民用。因而估舶多。僻地乃喧閤。增竈遂成郭。葺牆巧霧空。

困隨郎罷載行歌。雜囉嘖。我行湯山椒。比丘治蔬供。爲言弘正間。紺塔翔鐵鳳。苦海迷津人。遠望得無恐。願乞長者文。勝蹟復營綜。我口默不言。我心有餘痛。昔者嘉靖中。狡倭肆狂縱。實瞻寶相輪。一針亂帆送。幾曾弓仗放。但操兵刃弄。雜亂凡幾年。室家始同夢。坐起謝上人。吾文未足重。於時櫂舟還。特爲令長諷。謂知縣事王君璋也。此是不果行。吾機偶先洞。

題吳上舍榮根香圖

齊東老圃吾不如。走馬却返長山居。誓辭肥肉大酒社。手握鶴頭鴉觔鉏。園官日日送菜把。野客時時誇菊蕙。閒來插架散籤帙。惟有秦餘種樹書。

贈繆篆顧生

秦碑換棗木。傳刻或失真。詎若漢摹印。小大皆可珍。鑄金用撥蠟。琢玉同運斤。其文雖參差。離合各有倫。後人味遺製。惟取字畫勻。鐘鼎雜款識。古法漸以湮。顧生習繆篆。頗見精力勤。博采諸家體。覽者多所欣。一藝期至工。必也醇乎醇。請君薄流俗。專一師古人。

題崔慤畫鳩

我愛臨濠崔子中。輕綃畫出鷺鳩工。枝頭淡染春晴色。不著山花一點紅。

漕船

國家歲轉漕。每船六百石。官艚計所儲。爲斟千二百。其初由海運。險越虎蛟脊。波濤恆簸蕩。日月互跳擲。所以造舟時。不復算尋尺。入明改從河。水次盡置驛。不見真州估。浮江販豆麥。縮之僅得半。滿載未爲窄。安用萬斛寬。邪許百夫役。過牖逆上魚。迎風退飛鷁。臘開徂暑到。久而蟲鼠咋。惟以便輓丁。夫婦得汎宅。南去挾棗絲。北來收果核。誰爲迂緩圖。因循匪朝夕。吾聞琴瑟敝。絃者必更易。國計在鼎司。何時建良策。

御風圖爲魏坤題扇

渡海天王太崛奇。出關老子苦驅馳。未如拔地乘風好。萬里雲山恣所之。

題蔡徵君方炳著書圖

先生忠孝門。早歲力埋照。逃名名愈隨。祇緣筆舌妙。中年巾柴車。起應鶴書召。人多留囂塵。君乃返蓬籬。立意在千秋。肯貽北隴笑。淵源訂伊雒。圖書衍周邵。其言明且清。削繁領其要。今已七十餘。行不藉藜蔕。請觀息關圖。鉤膝但坐嘯。淙淙石罅泉。丸丸松頂嶠。山宜題六聘。洞可亞三詔。著書早晚成。先以語同調。

題李秀才琪枝畫梅

平生冷笑林君復。活剝江爲兩句詩。畫到影疎香暗處。始知一字可稱師。

贈王叟嘸二首

近來山水尙元人。南渡諸公法漸淪。惟有王郎嗜奇古。將無馬遠是前身。

畫家平遠最難工。三板輕船片席風。不數當年宋員外。瀟湘煙雨滿圖中。

張處士釣風圖

漁師蟹舍近西冷。露葦風楊岸岸青。我亦年來撐釣艇。秋花却少研頭餅。

青浦道中

不識三高士。松門第幾峰。潮回黃歇浦。草滿陸機茸。細雨春歸鴈。深山日暮鐘。坐看城郭近。猶是水雲濃。

五雜組九首

五雜組。刺繡文。往復還。金車輪。不得已。見貴人。
五雜組。染布帛。往復還。度阡陌。不得已。逢熱客。
五雜組。神鬼面。往復還。翻飛燕。不得已。交情變。
五雜組。霜林葉。往復還。圍碁劫。不得已。零丁帖。
五雜組。鳳尾羅。往復還。機中梭。不得已。勞者歌。
五雜組。裳衣袴。往復還。錢刀布。不得已。付質庫。
五雜組。車中果。往復還。江上舸。不得已。杭城火。
五雜組。徐州士。往復還。真州估。不得已。宿淮浦。

五雜組。裝潢手。往復還。媒妁口。不得已。飲甘酒。



曝書亭集卷第十八

古今詩十七

著雍攝提格

偕查孝廉入閩初發江干

清江自西來。海水逆流合。我帆挂東風。遙指富春塔。

自漁浦挂席至富陽二首

編郎唱櫓雨初消。查慎行突起東風送客船。百里晴山低似屋。彝尊一江新水健於潮。舟人謂江暴漲得

攜老伴無拘束。慎行縱是貧游未寂寥。況有月波春壑在。彝尊隔船不乏酒人招。慎行

江山小船急浪衝。彝尊疾若鷺鳥凌霜冬。慎行灣環忽轉赤亭岸。彝尊俄頃不見南高峰。慎行鱗魚出網

白尾尾。彝尊烏柏夾路青茸茸。慎行井西道人畫不得。彝尊暖翠浮嵐如此濃。慎行

桐廬雨泊

桐江生薄寒。急雨晚淋漓。炊煙起山家。化作雲覆屋。居人寂無喧。一氣沉嶺腹。白鷺忽飛翻。讓我沙際宿。

七里瀨

七里瀨急鳴哀湍。嚴陵於此留釣壇。兩崖怪石青攢攢。雨來欲上不得上。竹篙撐過鷓鴣灘。

瀧中吟

瀧中行。不知遠。雨初消。雲乍卷。藥苗長。蒲葉短。一夫牽船九折坂。纜逾急。舟逾緩。前峰合。後峰開。一曲轉。一曲迴。密樹重重暗。飛泉處處來。人家三五居瀧裏。半是樵夫半漁子。又白魚。捕烏鬼。釣車釣輪滿沙觜。黃白花開照瀧水。未必他鄉能有此。瀧中吟。子歌不足我嗣音。

晚次汝步乘月抵蘭溪城下

松科萬樹落花天。擘岸江風晚颯然。直到蘭溪看明月。浮橋不鎖待吟船。

雨發東峰亭和查孝廉

巖巖東峰亭。其下百尺潭。我來凡五泊。未果游精藍。茲晨復前路。解纜亭西南。溪雲散成雨。水木紛參覃。平生嬾馳騫。進拙退所甘。惟有利涉心。翻較估客貪。一帆飽風力。並坐篷底譚。夫君有高唱。令我歎息三。

水碓四十韻

百灘趨漸江。昏旦鳴不息。犖尊大波恣奔放。小波迴汨渚。查慎行居人擅水利。審曲引使直。犖尊其長走蛟蛇。其廣納溝洫。慎行遇防激之怒。徑隘流轉急。犖尊夫豈水性然。適來遭勢逼。慎行于焉扼其吭。壘石添樅杙。犖尊椽茅架小屋。度地隨偃仄。慎行斲木爲巨輪。當衝立樞極。犖尊旁安三十幅。幅幅輳斤墨。慎

行龜文交兩兆。鼈甲支九肋。彝尊括張等虞機。璇運就圓則。慎行江心鏡欲躍。海底月半蝕。彝尊滅頂泗人騰。升陞壯士踣。慎行尻高首或下。後湧前乃匿。彝尊團團牛旋磨。匝匝鴉翻翼。慎行棗軸貫中央。有如著在扞。彝尊循環觸牙動。揚者必先抑。慎行石臼質本頑。甘爲杵所賊。彝尊昂然馬騰槽。俛若鶴啄食。慎行砮碎應關板。次第符漏刻。彝尊擣紙十萬箋。取禾三百億。慎行穰秕除未盡。藤竹需孔急。彝尊一爲機事牽。焉得休汝力。慎行先王昔制器。取象配卦德。彝尊舟楫涉大川。耒耜徂畛域。慎行養生務佃漁。分壤別動植。彝尊鄰歌答春相。作苦爰稼穡。慎行俾習四體勤。羣黎無懈忒。彝尊後世技巧繁。淫奇難忖測。慎行桔槔輓轡作。便利成典式。彝尊紛紛鑿渾沌。一一逞胸臆。慎行能令蠢者靈。通者忽以塞。彝尊卽此水確論。用意略可識。慎行居然役造化。安坐無怍色。彝尊乃知天生民。若苗之有騰。慎行夜來山雨驟。趙漲漫澤國。彝尊沙崩岸漂沉。有械施不得。慎行物成久則毀。茲理復何惑。彝尊逸豫安可貪。民勞宜率職。慎行

篁步

去衢州二十里地產柑橘

江臯有篁步。地似果園坊。漸遠魚鰕市。真成橘柚鄉。株株當暑綠。顆顆入秋黃。輸與村夫子。經冬自在嘗。

常山山行

常山玉山相去百里許。山行十人九商賈。肩輿步擔走不休。四月溫風汗如雨。勸客何不安坐湖口船。船

容萬斛穩晝眠。答云此間苦亦樂。且免關吏橫索錢。

入舟

水窮甫登山。山盡復入舟。漸老惜筋力。得安且同偷。查慎行船子名船五尺狹。三槳劃兩頭。來朝放溜去。勝坐青竹兜。擗尊

沙谿鋪紀所見

十丈椶繩夜截流。朝來漁子掌中收。不知方法何從得。三寸白魚齊上鈎。玉山村人。施數十鈎於椶繩之上。曉起收之。鈎必有魚。

自焦石塘抵鉛山河口兩岸石山獐劣上無寸土尺木查孝廉作詩嘲之賦以解嘲

鉛山山肩排。一一赴湖口。鵲圖象覆釜。巨石堅不剖。躋攀斷僧蹊。左右絕林藪。豈惟質鈍悶。兼亦狀麤醜。畫師皴法窮。相對俱束手。道書紀名山。藏之大小酉。每因洞壑深。必使列仙守。茲爲百靈棄。動植無一有。乃知造化心。下視等芻狗。宜取見者憎。獻嘲自我友。吾試爲解嘲。賦形良亦偶。美石多自殘。斧斤或先受。高者礮作碑。下者窪作臼。汝以頑得全。庸庸福反厚。喻物材不材。此理本莊叟。

鉛山城中有古樟三每歲四月白鷺來巢其間伏雛乃去亦一異也

縣樓高樹半空腔。宿鷺飛來什佰雙。說與畫師翻舊譜。不須橫幅寫秋江。

發鉛山

昨憎山石鈍。今愛山石靈。譬若漢宮女。去尹來者邢。譬若秦地水。汲渭汰者涇。何期百里內。巒壑殊姿形。古樟百圍綠。幽桂十丈青。東西喚野渡。長短羅溪亭。泐泐寫下水。浴鳥梳其翎。人語山響答。忽焉頌清冷。巖花名莫辨。一一抽釵莖。我欲躡飛梁。深入紫翠屏。僕夫不解事。舍車邑外坰。前途定勝絕。明發宜侵星。

紫溪道中二首

筍皮蓋屋類團焦。留客依然酒旆招。只恐夜來風雨至。杖藜扶過紫溪橋。
新添十畝種荷田。也向山根吐細泉。料得村娃無懼曲。秋來不用采香船。

度紫溪嶺

征夫就炊煙。我亦治草具。一飯免飢劬。亭午復前路。隔溪辨微徑。千年樹根渡。不知身漸高。下視千年樹。我行方霽心。我僕已窘步。登頓力苦疲。巖椒且小駐。開襟納涼風。植杖一反顧。却指來處村。茫茫墮雲霧。

車盤驛題逆旅主人壁

曲澗層層響。叢篁个个齊。前山行更好。不信鷓鴣啼。

觀造竹紙五十韻

信州入建州。篁竹冗於篠。彝尊居人取作紙。用穉不用老。查慎行遑惜簫笛材。緣坡一例倒。彝尊束縛沉清淵。殺青特存縞。慎行五行遞相賊。伐性力揉矯。彝尊出諸鼎鑊中。復受杵臼擣。慎行不辭身糜爛。素質

終自保。彝尊汲井加汰淘。盈箱費旋攪。慎行層層細簾揭。燄燄活火煇。彝尊舍鹿乃得精。去濕忽就燥。慎行擘來風舒舒。暴之日杲杲。彝尊箸籠走南北。適用各言好。慎行緬維邃古初。書契始蒼皞。彝尊自從史記煩。方策布豐鎬。慎行中經祖龍燔。孰敢撲原燎。彝尊漆簡及韋編。殘灰跡同埽。慎行當時禍得脫。賴爾生不早。彝尊漢代崇師儒。家各一經抱。慎行截緝蒲柳姿。刀削詎云巧。彝尊如何剋物智。乃出寺人造。慎行麻頭魚網布。棄物收豈少。彝尊後來逾爭奇。新製越意表。慎行山苗割藤芟。水澆采苔藻。彝尊桑根斧以斯。蠶繭機不絞。慎行澄心光緻緻。鏡面波晶晶。彝尊研宜金粉膏。繪作龍鸞爪。慎行桃花注輕紅。松花染深縹。彝尊鴉青密香色。一一隨浣澡。慎行十樣益部箋。萬番傳癖橐。彝尊紛然輸館閣。逃矣來海島。慎行要爲日用需。若黍稷梁稻。彝尊惜哉俗暴殄。塗抹太草草。慎行俗詩鼃蠅鳴。俗書蛇蚓繞。彝尊俗學調必俳。俗文說多勦。慎行流傳人有集。刷印方未了。彝尊積穢堆土苴。餘殃毒梨棗。慎行或汙瓜牛涎。或供蠹魚飽。彝尊或爲肉馬踏。或被飢鼠齧。慎行黏窗信兒童。覆瓿付翁媪。彝尊遭逢幸不幸。所繫豈纖杪。慎行平生嗜奇古。卷帙事研討。彝尊祕笈藉爾鈔。羸金匪我寶。慎行響揚湖籀斯。斷碑拓洪趙。彝尊提攜白刺史。著錄庶可考。慎行由拳法失傳。將樂槽苦小。彝尊楚產肌理疎。晉產膚澤槁。慎行物情相倍蓰。美惡心洞曉。彝尊非無雲霞膩。愛此霜雪皎。慎行小疊熨帖平。捆載赴達道。彝尊預恐壓歸裝。又滋征權擾。慎行

烏石村

烏石村深一水灣。家家吠蛤閉柴關。此時惜少洋州筆。恣寫風篁十里山。

分水關

關門一道石參差。三戶人家兩戍旗。此去都籃休便棄。頭綱正及貢茶時。

崇安孔明府招飲縣齋池上賦贈二首

宛轉橋當戶。玲瓏竹引泉。官齋如此少。地主況能賢。白鳥巢琴閣。紅鱗動酒船。盡驅胥史往。清話得纏緜。一縣皆山水。尤奇是幔亭。從君乞小艇。導我入迴汀。羽蛻黃心木。苔皴白石銘。遺文當不少。歸日補圖經。

武夷沖祐宮

武夷君。異哉世所傳。或云錢鏐之二子。或云是魏王子騫。當時結侶高宴幔亭前。此挹衣袖彼拍肩。坎鈴鼓。急管絃。賓雲妙曲左右仙。一從彩雲散。虹橋斷絕上無緣。琳宮建何時。傳是天寶年。後王因之禱水旱。金龍玉簡投深淵。我來謁祠下。取徑芝朮田。入門高樹雄且妍。藤蔓曲似蛟龍纏。殿古石罅仙鼠穿。陳丹暗粉蝸吐涎。十二粟主配君像。中間名字或已湮。乾魚祭後祀典歇。但有村翁媵臘率社錢。縛草爲輪。剪紙爲船。不知仙人倏而來。兮忽而逝。雲車風馬電作鞭。胡用是物東西懸。長廊曲曲通迴旋。旁有道士館。房房戶戶相錯連。甘蕉綠搖漾。修竹青便娟。竹雞聲中摘茶葉。石榴樹底交茶煙。吾思此地洵勝絕。道書

名之曰洞天。阿誰屈置一十六。何山可以居其先。昔年禹平水土名山川。至今岳瀆垂虞編。不聞議者糾其偏。若茲次第逞胸臆。毋乃僞託非真詮。試質武夷君。吾言然不然。

宿虞道士山房

老樹藏雲壑。閒房割洞天。茶烘丹竈火。鹿飲鑑池泉。藥酒供人醉。繩牀借客眠。山深風候早。四月已聞蟬。

幔亭

白石留遺板。紅雲失舊裯。要知幔亭會。亦是避秦人。

坐竹簞入九曲

連峰六六收蒼靄。查慎行雨餘滑澗碎石街。彝尊挈我栗杖椶毛鞵。慎行蘭湯渡口上竹簞。彝尊篙工指點一曲涯。慎行題名幾處爭磨崖。彝尊娉婷玉女峰最佳。慎行野花簇髻松搖釵。彝尊當年武夷集神媧。慎行歌絃鼓板金管齎。彝尊高張雅奏無淫哇。慎行子禽小娥定爾儕。彝尊羣仙一散後會乖。慎行黃心老木委蛻蕤。彝尊爾獨對鏡留形骸。慎行千尋鐵障鎔頑錯。彝尊大藏小藏肩背挨。慎行山魈一脚帝所差。彝尊洞門石扇呀然闐。慎行壑舟力負何勛勦。彝尊其中瑰木如積稽。慎行又類羽鏃抽鞞鞞。彝尊水光汎汎聲泔泔。慎行冥冥微徑不可階。彝尊欲往金井迷鬼茝。慎行深潭龍臥波滄瀼。彝尊誰歟釣者貪。鮪鮓。慎行茶園新芽茁舊茝。彝尊僧籃道笈采摘皆。慎行可惜不逢紅粉娃。彝尊題詩古巖平不欬。慎行

精廬小於負殼蝸。彝尊豈若大隱屏之厓。慎行祠宇百世人模楷。彝尊大書照耀銀泥牌。慎行學達性天
聖德諧。彝尊屹然天柱高崑崙。慎行勢如拱揖趨庭塔。彝尊須臾路迴仙掌排。慎行神臯下上車駢駘。彝
尊竹窠桃磔雜樹槐。慎行龜浮獺控形驟催。彝尊白雲葦前雙眼揩。慎行俯視九曲瀟青縞。彝尊星村村
落尤可懷。慎行新苗活水通荆柴。彝尊穀犬跳聒雞膠啐。慎行況無蛇虎猿豺豺。彝尊何時買地營茅齋。
慎行耕耨漁戈與子偕。彝尊

虹橋板歌

板爲崇安潘秀才
在東所贈

虹橋板。可望不可卽。絕壁深藏太古色。日炙不黃。雨淋不黑。洪流不漂。土不蝕。百蟲將軍焚不得。吾欲梯。
長林梢。恐墮鸛鶴巢。吾欲駕澄潭坳。恐拔千歲蛟。鼉鼉倒懸蝙蝠墜。惟有怪鳥獨立時。爬抓潘郎嗜奇每。
置青玉案。鋸贈一條長尺半。爲言曩者避兵接筍峰。一夕急雨飛寒空。雨狂更起擲鷓風。虹橋板自天半
落。斜拖下壓黃冠宮。爾時青童白叟悚息不出戶。亟持此板歸山中。吾聞茲言吁可怪。石泐金銷此不壞。
旣非桐與樞。又非榿楠杞梓楓豫章。穀紋水波蹙中央。沈思是物豈無用。何況獲自仙居洵堪重。當時宜
和好古祕殿無爾曹。吾今藏弄足以豪。試令刻作黃神越章印。山行蛇虎應潛逃。

仙蛻巖

魚家姊妹趙家兒。雜坐歌師間板師。莫唱人間可哀曲。山阿遺蛻也堪悲。

御茶園歌

御茶園在武夷第四曲。元於此。剏焙局。安茶槽。五亭參差一井冽。中央臺殿結構牢。每當啓蟄百夫山下喊。事見武夷志。樅金伐鼓聲喧嘈。歲簽二百五十戶。須知一路皆驛騷。山靈丁此亦太苦。又豈有意貪牲醪。封題貢入紫檀殿。角盤瘦枕怯薛操。小團硬餅擣爲雪。牛潼馬乳傾成膏。君臣第取一時快。詎知山農摘此田不毛。先春一聞省帖下。樵丁羹豎紛逋逃。入明官場始盡革。厚利特許民搜掏。殘碑斷臼滿林麓。西臯茅屋連東臯。自來物性各有殊。佳者必先占地高。雲窩竹窠擅絕品。其居大抵皆巖壑。茲園卑下乃在隰。安得奇茗生周遭。但令廢置無足惜。留待過客閒游遨。古人試茶味方法。椎鈴羅磨何其勞。誤疑爽味碾乃出。真氣已耗若醴餉其糟。沙溪松黃建蠟面。楚蜀投以薑鹽熬。雜之沉腦尤可憾。陸羽見此笑且咷。前丁後蔡雖著錄。未免得失存譏褒。我今攜鎗石上坐。箸籠一一解繩緇。冰芽雨甲忝品第。務與粟粒分錙毫。

仙掌峰瀑布

仰瞻兮山陘。懸瀑布兮翠屏。忽循兮山後。泉涓涓兮鳴石竇。石竇兮中開。激衝風兮轟豗。一丘兮一憩。忘吾道兮邈迥。菖蒲菹兮烏麻飯。青松陰兮白日緩。思移家兮駐顏。年七十兮未晚。

天游觀萬峰亭

大山相排連。小山補其闕。羣峰罕異向。危亭乃孤揭。適當地敞閒。不在勢突兀。虛明徹戶牖。豁達埽煙燁。盪空激颺輪。照夜湧日軌。有時霧著巾。忽焉雲觸轡。憑欄恣眺聽。靈境信超越。儼同喬嶽尊。遠爾盡朝謁。紛紛揚旌旆。穆穆秉圭笏。又疑三海圖。神物互出沒。足或蹶夔臄。背或負蛭蟻。前平訝象耕。後陷類狐搢。隱屏翕而張。接筍斷不蹶。長松偃薺菜。細竹披苗髮。溪流乍隱見。祠屋半彫歇。歸然此獨存。坐久興逾發。雖云冠山椒。何異在巖窟。石房一道士。清癯老鶴骨。延我崎嶇丘。靜埽苔徑滑。苦無青精飯。力爲煮葵蕨。高田歲未荒。四月草先墜。分種及胡麻。安碓響深樾。相對生隱心。欲歸恨倉卒。何當裹餼糧。留住一百月。

樟灘

建溪饒驚濑。樟灘最巉險。顛波勢欲下。亂石故磨颺。窪坳碾作渦。刻露圭就琰。我衰憂患多。過此容色斂。篙師凝睛立。尺水巧迴閃。鏗然矢投壺。狎恰不誤點。輕舟恣一擲。縱若鳥脫罨。以茲推物理。遇境適夷險。人或發禍機。忌者思盡掩。揚瀾沸平地。鑿空架崖厂。由來人背噂。未必鬼神貶。濟盈軌易濡。忠信幸無忝。習坎入坎凶。旣出夫何玷。浮海桴可乘。舟楫況列剡。

建陽

徽公舊是建陽居。竹樹清疎畫不如。講席至今留未改。人情大抵好相於。得觀雲谷山頭水。恣讀麻沙里下書。此意殘年仍莫遂。扁舟欲去轉躊躇。

延平晚宿

兩兩浮橋趁浦斜。居人分占白鷗沙。瓜瓢豆筴迎船賣。只欠南鄉澤瀉花。建寧產澤瀉花。可噉。昨過未及買。南鄉橋名。

雨中過黯淡灘

灘光黯淡雨連坑。一笑船師勸客行。三疊跳波兩搖手。櫂歌十里下延平。

水口

岸濶灘平漾白沙。船人出險鼓停撻。爲貪放溜風頭坐。不覺蜻蜓上槳牙。

竹崎關

溪漁樹底輸稅。關吏津頭算緡。縱有僧樓藥院。日長吟眺何人。

食荔支寄查上舍弟嗣栗時在秦中

荔子漿酸價未高。風前試解絳羅袍。當筵忽憶西征客。馬乳涼州也自豪。

噉福州荔

噉荔如噉蔗。佳境須漸入。必待藍紅江綠熟。始嘗何異渴人禁之飲米汁。粵洲火山四月丹。也勝盧橘楊梅酸。我來福州日北至。投我只合齊堆盤。端明譜中三十有二品。大槩綃衣雪作衽。粵人誇粵閩誇閩。次第胸中我能審。

林叟偉攜二子載酒過

釀比官醪。醖肴看水族分。老年思舊雨。深話到斜曛。契獨存僑札。交須合紀羣。不妨留秉燭。作賦共誅蟲。

甘泉漢瓦歌爲候官林侗賦

西京無書家。但有急就凡將篇。其後闕里關。乃得五鳳二年甄。滕公石室閉已久。文體倜詭乖自然。芝英鶴頭書。歲遠俱沉堙。孰能抉淵奧。冥索崔張先。候官林侗媿蒼雅。袖中忽出甘泉瓦。長生未央字當中。逸態橫生恣塗寫。定州漢廟不足珍。銅雀香姜盡流亞。吾聞甘泉本是祖龍之所遺。武帝因而恢拓之。非無益壽延壽字。今已蕩盡蠲錙釐。金銅仙人去渭水。椽桷自毀化作龍鱗而。當知是瓦定有鬼神護。不然安得團圞如鏡。勿使纖毫虧。伊誰擅此隸法古。毋乃史邈丞相斯。下至元封人物能爾爲。侗也耽奇莫與並。手搨硬黃墨一挺。裝池作冊索客題。重之不異焦山鼎。吾生亦好金石文。南踰五嶺西三雲。手披叢篁斬榛棘。殘碑斷碣搜秋墳。攜歸蓬屋少香芸。壁魚散走飢鼠嚙。蟲涎粉蛀徒紛紛。侗兮侗兮真好事。殿闕遺墟靡不至。短衣匹馬尋昭陵。陪葬諸臣表銜位。旁及降王一十四。右先咄咄左什忒。殿以那順范頭利。舊史缺漏新史刪。侗也爲之考其次。試入儲藏蘭話堂。長物何論僉一筭。君家嚴君政不苛。至今秦地猶謳歌。年過八十尙健飯。丹砂不餌朱顏酡。兼珍之養樂事多。長生瓦兆本爲此。請君一日三摩挲。

長慶寺噉荔支二首

長慶古僧寺。獨公新道場。重來疑夢寐。六月轉清涼。老喻苦瓜苦。曩客廣州訪獨禪師於海幢寺。饌進苦瓜。予不食。師言居士少年不耐苦也。

渴思香荔香。七星空有井。不用汲寒漿。
魚網船船漉。土人伐荔子木。浸水以漉魚網。樵柯歲歲殘。連根移上苑。重馬走麇官。再至雙林少。寺中荔子舊有五。百株。今只百餘。他時一飽難。山僧會客意。臨別更堆盤。

又聯句

熱客辭三伏。精廬訪一龕。園開小暑後。徑盡側生南。彝尊僧臘嗟頻改。禪房亦舊諳。茶瓜宜屏却。梯閣緩登探。石門吳震方幼超。劇喜青猿捷。先除石貝貪。荔蟲也。層層堆玉案。各各滿筠籃。查慎行露比三霄冷。漿同十酒甘。倒囊元止渴。勿藥定祛痰。彝尊譜就全勝畫。評時恣倚擔。瀘川知不敵。珠海較無慚。震方鎔蠟思封蒂。磨鉛欲代甌。載歸鄉曲好。終賽一筒柑。慎行

汪學使薇餉楓亭荔

香荔誇奇絕。楓亭古驛中。色雖殊挂綠。品已壓輕紅。一種生偏側。千房味不同。重煩故人意。分減及衰翁。

林封君招飲榕菴

細泉危石響崢嶸。避暑筵開接款顏。祖竹杖多供客借。佛桑花放許吾攀。入門愛坐千年樹。對酒平臨一朶山。珍重主人投轄意。留看七塔夜燈還。

龔運使招飲園亭

烏衣子弟列通官。逸興東山老謝安。六月開筵花事好。百分勸客酒杯寬。閒輸沼上鯀魚樂。醉任塔前海鶴看。已是晚涼收羽扇。更排高棟俯層欄。

飲張舍人巖齋

門才風貌阮何間。官簿重題右史班。三伏尙能留客坐。一瓶相勸借書還。濃陰古壁垂馭蔓。驟雨新苔滑小山。我醉已拚逃席去。更煩香甕出屏彎。

江瑤柱

異味傳方域。嘉名注食經。連江誰布網。獨漉忽登鏹。遞自三山速。風來五月腥。羚羊羸見角。蠟蠹斂同形。銳比盆花錘。圓同鈿帶鞞。粵呼爲角帶子探腸先去甲。刮膜止存丁。淨洗膏猶沃。新烹火莫停。冰檐初挂鐸。雪菌乍抽釘。白嚼河豚乳。紅餐荔子廳。誰言分鼎足。試倚竈觚聽。

閩中海物雜詠七首

西施舌一名沙蛤俗呼西施舌

吳人輸一錢。思覩西子頰。何如得網中。宵分齧其舌。

香螺

鮫魚雖言美。祇供漢賊餐。莽操俱嗜此。詎若香螺潔。日上先生盤。

鱓閩小記一
名鱓蚌

綠蒲包海鱓。味勝蟹胥滑。一笑過江人。嘔心為蜚蚶。

鱓魚腹下有十二足。雌雄常相負。取之輒作雙。

尾插茨菇葉。臍攢螃蟹箱。南庖驚束手。非止北人嫌。

花蛤

略識味似螯。寧知化非雀。誰加水族恩。特與繡衣著。

黃螺

肉縮等蝸角。涎腥過蠟房。憐渠一破殼。也有九迴腸。

珠蚶

海物多充庖。珠蚶亦配酒。取禍自有胎。不在深閉口。

題讓竹亭修禊圖卷

今年禊飲負花時。讓竹亭前到恨遲。比似永和應更勝。坐無一客不成詩。

飲陳孝廉學洙烏石山房

旅館苦毒熱。若鳥困樊笼。忽聆折簡招。柅車道山阿。此身離沃焦。冰雪投岷峩。主人頗善病。賓至移藥籬。預儲楚筍鞵。易客深雍鞞。巖壑不在僻。位置因坡陀。層欄萬井上。三面雲遮羅。俄看魚鱗收。一峰青一螺。日永風舒舒。卷幔吹漸多。亭幽倚翠壁。曲磴交荆莎。涓涓細泉流。攬石注陽坡。誰滋徑寸泥。乃吐雙莖荷。木桃綴華實。扶荔撈鮮波。瀏覽隨所欣。樂飲日已趨。既無形骸拘。且免監史苛。杯闌見題句。小陸此寤歌。髣髴書策存。陳子出雅豈忍輕聖磨。吾鄙物外心。從茲數娑拖。肯於三伏時。禮法繩愆訛。作詩繼小陸。觀者任諧訶。坪之門

題汪方伯小像三首

澎湖小別五年餘。消息頻傳過嶺書。一笑相逢還看畫。故人瀟灑只如初。薇堂綳子出花前。野老來逢湯餅筵。料得牽衣添阿囝。肯容郎罷賦林泉。乳毛五鬣拂龍鱗。瘦石多成雨點皴。此景并爲君占取。更留何地屬閒人。

壽山石歌

無諸城北山青嶺。近郊一舍無楓杉。中間韞石美如玉。南渡以後長封緘。方輿勝覽於福州土產首載壽山石是誰巧搯蛙。蚓窟中田忽發蛟龍函。剖之斑璘具五色。他山之石皆卑凡。我昔南游翫塘市。對此不覺潛始歎。是時楊老善雕琢。楊字玉璫紐壓羊馬鑿麤麤。兼金易置白藤笈。不使花乳求休撓。今來賈索尙三倍。未免瑕漬同梅

賊其初產自稷下里。後乃深入芙蓉巖。菁華已竭采未歇。惜也大洞成空嵌。非無桃紅艾葉綠。安得好手來鐫劂。桂孫見之不忍釋。裹以黃葛白蕉衫。伏波車中載薏苡。徒令昧者生譏讒。況今關吏猛于虎。江漲橋近須抽帆。已忍輸錢爲頑石。慎勿輕露條冰銜。近凡朝士過關者。苛索必數倍。

高斯億爲余畫竹以三絕句報之

故人有才子。斯億爲老友。雲客之子。爲我埽叢筠。長帽眉山老。看來足亂真。

細似楊无咎。疎於顧定之。清風愛相對。赤日最高時。舊種南垞竹。圖中勝百分。歸裝無長物。得此卽封君。

以蜜漬生荔支戲成一律

省得紅塵一騎忙。輕郵試驗指迷方。兩教爐火煎鉛液。更犯巢蜂割蜜房。沃水預愁擔僕困。開筵試共酒人嘗。到家翻惹兒童笑。那不圓籠寄海航。

曝書亭集卷第十九

古今詩十八

屠維單閼

羅浮蝴蝶歌

爾雅釋蟲名。蝴蝶直不錄。之蟲豈無知。小大各有族。小者撻末產江東。大者乃在朱明曜真之天巖洞中。當其物化初。天與形不同。蠻雲華首紫。海日搏桑紅。游禽五色詎敢啄。滿身香霧花濛濛。仙之人兮拍手笑。愛爾翩翩特娟妙。或云葛翁衣。或云麻姑裙。二者傳說徒紛紛。入秋倦飛絲乍冒。葉底風搖滿山繭。垂虹亭長手拄卽栗條。去年踰嶺尋鐵橋。歸來雪灘纔卸馱。分我蝶繭剛一箇。留之十旬鳳子生。曲腰短足相搪撐。豎雙眉。張兩翅。輕於吳綃薄於紙。對神光之陸離。駭賦質之侷詭。我思此蝶放之四百三十二蜂前。餐英嚼蕊恣歡妍。何難大似車輪然。我今縱之出簾柙。可惜不諳飼花法。雲母扇。丹霞衣。嗟爾萬里安得歸。文章枉使負奇色。不及灰黃粉墨野蛾高下東西飛。

又近體四首

攜來柏葉綴莎蟲。蝶繭多懸物候初溫五月風。蝶以五月朔破繭出。玄鳳忽然看倒挂。仙蠶深恨不同功。粉香弄玉

勻塗後。裙色麻姑想像中。離合神光終莫定。畫圖誰信小滕工。蛺蝶圖。滕王元嬰子。湛然所畫。

藤笈初開且試飛。槩牙牆角見應稀。輕狂忍把霜紈撲。愛惜須加繡幕圍。萬里風花香入夢。六朝金粉畫

成衣。吳娘正要湘裙樣。分付流黃第一機。宋樂府有九張機。自一至九。

籬邊野外舞春駒。認得羅浮種獨殊。衆裏自應呼鳳子。生來只解抱花鬚。鉛華水淨分初日。金縷衣輕

五銖。比似吳人看西子。未貪市上一錢輸。孟子疏。西施至吳市。觀者各輸錢一文。

猶記歸裝嶺外齋。炎天二月展金泥。衰年再見真難得。異物初生也不齊。偶落人間休悵望。但留花底莫

東西。寄聲爲報垂虹長。好配新蛾與並栖。虹亭笥中。尚存三繭。

題瞻園舊雨圖二首

壯年蹤跡任西東。老去諸餘念漸空。醉地至今猶戀惜。大功坊底小園中。

花南孔雀翠屏張。共倚新聲八寶裝。誰向井邊歌舊曲。淳熙半隸幾斜陽。園有井。闌刻淳熙年字。

長水曉行

月暗千重樹。風微一葉舟。殘星高太白。重露滴牽牛。菽乳新漿熟。魚標小市收。不知葭菼岸。吠蛤爾何求。

荷花

梁間巢燕幾曾來。竈下狸奴去不回。猶有荷花憐舊雨。年年一爲主人開。

七月八日張孝廉大受招高上舍不齋載酒過百花洲索予父子吟藁率賦

七夕已過猶蘊蒸。廚船遠發太湖棧。攜來瓜果嚼復嚼。盡此壺餐能不能。舊日詩篇忘甲子。老年書法誤丁朋。煩君并向狂兒索。病劇知渠起未曾。

李高士延晷墓下作

慷慨松江別。淒涼桂水還。擔花嘗郭外。賣藥遍人間。野史何由續。遺書尙未刪。空餘懷舊淚。一灑柘湖灣。十月二十一日喪子老友梅君文鼎歸自閩中扁舟過慰攜別後所著書見示部帙甚富余亦以

經義考相質并出亡兒撫韻遺藁觀之成詩百韻次日送之還宣城兼寄孝廉庚

老夫初失子。痛若遭鞭刑。騷騷理喪具。裂布帷兩楹。本爲共命鳥。卒然翦其翎。天乎獨何罪。此禍丁我躬。

姑弘切有叟裼裘來。扶杖叩我肩。袖中出誄辭。書之鵠紋綾。旣以悼逝者。且用慰頽齡。申言聖賢阨。難免造

化憎。西河授詩義。不聞子在甕。尼父成春秋。不聞鯉趨庭。遺恨古則爾。所以尙達生。叟言我瞿然。旋收淚一升。延之西窗坐。試話睽離情。與叟別八霜。蹤跡如蓬萍。或淹津門居。或栖皖口城。北書鴈翮蒼。南書魚尾頰。茲從閩江至。始獲遂合併。青猿長五尺。一袂書手拾。持籌計長歷。制器窺圓靈。削木驗日晷。繪圖準方程。我思古帝治。七政齊璣衡。下及周女士。咸知列宿名。束楚抱衾裯。觀象乃宵征。畢雨箕風揚。武人解辨形。後世祕其術。張眼同晦盲。瑣瑣靈臺郎。曷能測穹冥。下學理帖括。怠棄夏小正。百翻兔園冊。足致公

孤卿昏昏軫蓋中。莫辨一點星。居然變陰陽。上應中台明。三才昧其一。庶績何由凝。叟書析微茫。該洽純粹精。惜乎時不用。歲月老笠箠。我亦志述作。緬懷三代英。流俗是末師。立心壞先型。埽除詩書序。區別義文經。客或立異義。黨附紛譏評。恨不漢晉儒。驅納咸陽坑。以茲經義廢。勦說徒相承。於焉考史籍。旁綜墓碑銘。下及稗官說。也復掇華菁。百川趨四瀆。導之入滄溟。百穀播三農。穫之聚坻京。先民可不死。身後留名稱。書成五鳳子。來集軒窗櫺。蓮有並蒂實。蘭有同心莖。按之瑞應圖。僉謂斯祥禎。況記洗兒初。熱湯盆中盛。有文在其背。曰壽似可徵。云何凶短折。我心滋不平。兒兮洵聰慧。閭鄙誇寧馨。九齡善學書。楷法工撥鐙。十五嫺詞賦。下筆人皆驚。視不眩邪色。聽不惑姦聲。清心薄嗜慾。生產絕勿營。性亦勤著書。席研希留停。請看所排韻。力欲闢榛芳。涼花帶風露。哀玉明瓏玲。又如食俊味。盡洗官庖腥。比於回溪諷。獵史尤縱橫。宋日鄉人錢調。纂回溪史韻。憶當病少間。黏紙連門屏。諸書八萬卷。剔蠹捐乾螢。陳言委時夫。秀句羅元兢。良由深意苦。甘使定命傾。先猶木支廈。俄而綆脫餅。恆幹不久留。所惜目未瞑。吾家太傅公。清德踰冰凌。王父守滇郡。得歸賴贈行。先祖知楚雄府事。聞曾祖妣何夫太人計。奔喪囊無貫錢。巡按御史贈行。乃得歸。先人失舊業。恥爲塵垢櫻。負郭無遺田。八口一豆羹。雖嘗役婢僕。五世罷笞撻。人言積善家。降殃顧匪輕。念此腸九迴。孤憤氣填膺。俗傳老婦祭。不修禍所嬰。我貧無黃羊。何以媚竈脛。或者童男女。讒口上告天。他經切。竈神有。雛童驕孫六女。又聞道士言。夜必守三彭。我嬾動堅臥。尸蟲釋拘囹。或者請于帝。奪我才子年。奴京切。魂筮掌巫陽。鬼律著女青。寧期意所嚮。務俾才

者懲。將無太山錄。明神未式憑。第假鬼伯權。好惡初無恆。修短雖有定。我心終怛怛。叟也驗歷數。消息可立成。試爲窮九厄。因之推八紘。山河戴斷鼇。地何震死鯨。楓何以膠折。栗何以芽萌。莫莢何以落。桐葉何以增。律何吹黍轉。鐘何應霜鳴。此何亡也忽。彼何勃焉興。鄰里皆多男。我何獨孤惇。叟宜指我迷。喚我夢甦醒。答云萬品殊。二氣互陶蒸。舒慘物不齊。五曹算未能。呼童開瓷甗。飲叟酒一觥。冬春煮糲飯。寒燭燒短檠。卓午詎忍去。徘徊曝書亭。吳船闊三板。送之還宛陵。我詩儻垂和。兼語猶子庚。

怪鷓行

曩時怪鷓吟。嘯池上柳。喪我南村詩人李十九。五年不聞汝惡聲。東鄰西舍賀太平。今秋胡然忽而至。見之不異眼中刺。吾家阿繆衾枕間。歎息鷓來命將逝。初猶遠林深處夜半鳴。旣乃橫飛不待日晦盲。搖頭鼓翼坐屋角。後眺先笑窺檐楹。始知是物本爲鬼伯使。如俚導虎山蹊行。訓狐賊人梟食母。汝與同輩尤陰獰。喚人魂魄亦何苦。況擇善者戕其生。嗚呼吾子今死矣。欲不遷怒及汝非人情。聞之周官建有庭氏。翼氏誓蒞氏。射以救日之弓。救月矢。必覆其巢。攻其翅。先王有害務盡除。豈若今人昧茲理。吾將斷竹續竹。彈以丸。毋俾惡鳥來林端。月辰二六星四七。方書去汝夫何難。

除日二首

感念亡兒苦。難收淚兩行。夢中猶定省。歲杪益淒涼。秃筆堪成家。遺書尙滿牀。多情酒壚伴。作賦比山陽。

上舍顧仲清咸三文學金介復俊民戴鏜淑章李宣景濂俱有輓章

典祀先人臘蕭然魚菽存薦時煩寡婦拜後止童孫老分歡娛少閒將甲子論知無頌花客未暝闔蓬門

上章執徐

送窮日作

吾家五窮鬼四世推不去今晨縛車船送往河隄住水萍風中絮散作千百身勿使天壤間乃有石季倫

君平鏡歌爲家上舍思贊賦

古銅一片漢所治冷光溶漾符月儀其背有文繚繞之由中及外皆銘詩文或中斷字橫施讀之百過猶
囁呢聲牙齟齒摧髯而良久始獲通其辭乃是君平之所持惜乎未覩書年支成都卜肆新雨時若榴花
分槎上枝手挽織女機中絲以之自鑒鸞鶴姿軸簾布卦營神蓍百錢拄杖足自怡酒家戶戶招青旗從
游弟子侯芭師暇日長定肩相隨識此奇字當解頤千年土蝕苔髻髻繡成碧綠丹黃緇阿誰磨刮無纖
疵吾宗子仲性愛奇裹以重錦導長綏大笑俗尙蟠蛟螭開奩一照冰雪肌木魅却走山精馳吾聞仙人
鏡四規澂心定志有所思方來之事罔弗知是物度亦神所司慎莫使近粉漿腴華山精舍春日遲長廊
急溜鳴堦墀落梅滿地藥甲滋主人勸飲墨玉卮桐與考古恣遨嬉古來金石各有宜其人已往文在茲
金尤易鑠質易虧昔賢嗜好情不移錢志小大印官私家有款識宋傳貽七鐘九卣廿鼎彝鐙槃刀尺別

等差。何哉鏡銘獨見遺。嘯堂舊篆曾取斯。挂一漏百人交嗤。吾今對此興不衰。思搗繭紙研隄糜。亟令巧匠爲裝池。鏡兮鏡兮爾勿悲。神物遇合信有期。

春日南垞雜詩七首

入春風雨太連綿。著屐扶筇越陌阡。鄉里兒童莫嘲笑。已過七十杖朝年。七十杖朝。本祭義。

睡起三商未覺遲。春衣盡典謾嗟咨。諸公袞袞黃河岸。正值桃花水上時。

十年手種池南樹。今歲纔分花白紅。尚有舊游三叟在。謂繆泳。鄭玘。錢枋。不知更醉幾春風。

舍外青鳩解喚晴。籬根玉版慚抽萌。無兒可遣修雞柵。客至生憎臘膊鳴。

瓜頭水綠樹根流。早有活東池上游。只少故人攜酒榼。醉來新月送行舟。懷徐上舍。

社公小雨不黏沙。瞥見迎風燕子斜。料是東家巢已定。但來花底啄芹芽。

移種盆松六尺強。欲當車蓋蔽斜陽。不知黛色成陰日。此地何人結草堂。

巡撫宋公以新雕蘇詩施注見貽賦謝

元祐罪人編年詩。東坡自寫背面像。題曰元祐罪人。誰其注者施元之。中丞訪得嘉泰本。上客爲補由儀辭。梅谿舊箋付

醬瓿。傅穉遺楷傳漕司。嘉泰本刻之。淮東倉漕司。吳興傅穉漢孺所書也。衰齡撥書反覆讀。笑比黠鼠啣薑時。

飲顧孝廉嗣立秀野堂同周吉士彝賦

秀野堂深曲徑通。巡檐始信畫圖工。王給事原祁寫小山窠石屋高下。清露戎葵花白紅。已許糟丘成酒伴。不妨蠹簡借郵筒。入秋準踐登艫約。吟遍江橋兩岸楓。

借陳同知昂畢上舍大生李孝廉大中從孫丕戴登澱山寺謁秦女祠分得合字成三十韻

二百里澱湖。夙與團柳合。茲丘峙其隅。歷眇等羸蛤。想當在中流。川氣互蒼白。漁商恆惴恐。波浪恣碣磕。愛此一簣山。表以千花塔。風帆走四面。烏鵲遶三市。傳聞秦女神。於焉沉錦躅。大姑鶴背騎。仲姑蟾背踏。季也鞭青蚪。履用五絲鞮。力能役鬼工。地戶信捭闔。忽悅靈旗翻。飛雨響修颯。物換改桑田。祠宇儼蘭閣。月檐搖綵幡。煙帳熏紫蠟。至今千歲蛟。不犯青苔榻。其西鑿井泉。與湖暗呵欲。綆餅都棄寘。猶幸闌未塌。循徑入寺門。虛廊屏囂雜。土灰掩法王。無復辨魚鵠。一童啓荒扉。一老補敗納。既免禮數煩。且喜朋簪盍。巖幽足眺聽。鳥下乃潛廬。言是龍子蟠。黑雲時出納。何年湧山根。若頤咯噬嗑。鴨脚樹兩株。不知幾僧臘。柯條神所護。孰敢肆摧拉。試驗縱橫陰。誰與量玉鉛。南有修竹林。冷翠壓簾簞。疎籬野薔薇。綠刺見斜搭。坐久山鳥鳴。惜哉少酒榼。何處星星鐘。隔浦遠相答。

徐檢討鈞紙扇讀修上人詩愛其清逸上人時訪余放鶴洲余留吳不值却寄以詩

少年上人足佳句。清似玉壺一段冰。絕倒垂虹舊亭長。來尋放鶴老詩朋。迂辛短李許誰和。癩可瘦權知不能。何日扁舟攜白麓。聯吟竹屋夜窗燈。

澱湖陳氏書齋觀吳仲圭爲陶九成畫竹居圖冊

吾鄉梅花衲。畫竹如箭橐。但留煙雨叢。不必定娟好。一叟南村來。林泉互幽討。爲寫徑尺圖。離落皆意造。兩書至正年。其體近章草。題句十一翁。一一盡遺老。我友澱湖潛。竹居等鄰保。真蹟儲篋中。啓示藉文繅。孟夏風始薰。新篁小亭抱。髣髴秋聲聞。可以除熱惱。道人述松雪詩有歸聽秋聲之句故及之

題納涼圖

愛伴雲根坐。還留羽扇揮。休添一星燭。便惹麥蛾飛。

陳君緘寄普光王寺二碑索余游記復成三十韻兼寄錢上舍相齡高處士不憲

我聞千佛名。載在三車書。惟茲普光王。梵夾乃忽諸。佛說無普光王經。唐中宗時。僧伽建寺。請名普照王。寺中宗以照字是天后諱。乃改爲普光王寺。親書其

額賜焉。茲寺蓋襲其名。流傳南渡日。有僧棲山岨。危榜兆吉夢。初地開精廬。要知法王子。信者意所如。偶然占高座。

卽事傳方輿。當其始經營。入定走魅魘。結成多寶塔。倒景浴修渠。莊嚴水晶域。瀟灑青豆居。有若爛銀盤。

中湧翠芙蕖。過者停畫橈。清辭琢雕瑣。四明吳文英過此題滿江紅詞陳迹歲三百。鼓簫歇巫胥。花宮縱蕪沒。臨眺興有

餘。波潮息廣澤。禾麥交平畝。導水固有術。泄之以尾閭。忽念淮泗衝。濁河苦填淤。誼誼禱壁馬。折柳沉薪

樗。至尊日焦勞。羣公但躊躇。千艘未得轉。何以實倉儲。芻蕘效未喻。西北水易疏。沾有七十二。可以通沮

洳。淀有九十九。可以興耰鉏。俾之納稔秔。亦得收蒲魚。天庾旣以充。河患不待祛。焉用萬斛舟。牖口紛牽

挈誰能急先務。草莽徒歛歔。良辰且游衍。藻景方舒徐。悔不抽帆檣。悉留心相於。左拍高生肩。右攬錢叟祛。誅茅此山麓。耦耕晞澗沮。

近來二首

近來文人愛標榜。不慮旁觀嘲笑工。但架廬陵屋下屋。瓣香誰解就南豐。近來論詩專序爵。不及歸田七品官。直待書坊有陳起。江湖諸集庶齊刊。

陸秀才競烈南田書屋圖

近郭一丘一壑。到門有橋有船。主人著書檐下。不入城市經年。

送李司訓琇之括州

我聞括州洞天福地有其四。近在縉雲麗水青田間。廣文先生此去主郡學。芙蓉面面峰迴環。毋嫌籤程遠。毋憚行旅艱。揚帆七里瀨。舍櫂雙溪灣。我昔逢雨雪。冰膠磴滑不易攀。子今乘清秋。一日可以超重關。惡溪亦不惡。終年水潺潺。隘口亦不隘。終日車班班。青衿胄子載酒至。往往剝啄鳴樞櫺。龍泉碧盃蛛絲斑。香菇菜筍飯赤粳。全家志在潔白養。三簋之祿足以怡慈顏。況聞此地僻且閒。有腰免使陶潛彎。熱官何如冷官好。宴坐但看門前山。新詩相憶肯相寄。老夫爲子方便刪。詞方便刪。元微之句也。

東湖曲八首

弄珠樓外月輪明。九派寒潮一夜生。怪道漁榔爭入市。白鰕青鯽滿東城。
十里湖光一葉舟。五層塔火浴中流。曉來寺寺霜鐘急。驚起啼烏掠渡頭。
吳娃蕩槳濕輕紈。西浦菱歌聽未殘。路入板橋舟去遠。游人尙擁赤闌干。
博陸祠東畫舫開。兩頭簫管勸交杯。城門緩鎖銅魚鑰。坐待三更月出迴。
黃雀披綿出葦荇。花雞剖腹露紅椒。不煩蘆瀝晶鹽糝。米汁船娘手自調。
鱸鄉蟹舍說豐年。秔稻當湖熟最先。一雨新晴纔幾日。家家門外送租船。
化城香刹裊幡竿。五髻如來石作壇。乍浦南風潮兩信。新黃柚子滿堆盤。
夾岸笆籬麕眼麓。近船花草錦茵鋪。湖邊漸少閒田地。堤上宜添賣酒壚。

題趙方伯勸農圖

三農播百穀。原隰各有宜。匪特因地利。又必循天時。民生務在勤。豈可惰四肢。耘耨一不力。苗莠豆爲萁。
炎暑尤可憐。秧馬苦蹲踖。晨蠃夕飛蟲。一一嗜頑肌。及其登場圃。手足盡皴胝。磨礱且簸揚。然後供一炊。
云何不愛惜。等之萑稗爲。盈倉飽雀鼠。百斛飯僧尼。國奢當示儉。先務宜在茲。我后省耕斂。蠲租起瘡痍。
作繪耕織圖。子予先保釐。公復纂質言。勸農書也。鏤版下有司。遠邇七十城。戶誦比書詩。齊民諳要術。風俗公所移。吾衰受一廛。僻在長水湄。披圖媿善頌。對此豁雙眉。

南浦歸舟圖爲李上舍宗渭作

已別東湖夜月將拏南浦歸舟好占日色風色直泝饒州信州

西湖

十三亭子景平分銀榜昭回天漢文破除水墨馬一角馬遠有水墨西湖十景冊畫不滿幅人稱爲馬一角姚雲東詩宋家內院馬一角是也界畫
金碧王孤雲裏湖外湖煙樹接斷竹續竹山泉聞承恩父老衣黃絹芸鼓鑿鑿報夕曛

臨平道中是日立春

老矣孤蹤尙棲泊小除日近始來還且沽市中釭面酒臥看雪後礬頭山谿雨移時泥滑滑舟人上岸腰環環安平泉源一叢樹早有春鳥鳴其間

虎山橋夜泊

薛家車子十四白傅歌童一雙風定虎山橋水月明蠡殼船窗

曝書亭集卷第二十

古今詩十九

重光大荒落

二月朔查山探梅集六浮閣分韻得覃字

查山一卷石。太湖匯西南。梅花幾百萬。亂插如蒼簪。我來微雨後。盡坼霜苞含。橫披谷錦繡。倒映天蔚藍。高臨銅官井。下者菖蒲潭。麋眼編疎籬。鹿胎糝空崕。卑枝或壓帽。瘦蒂恆飄衫。粉蝶羽翻飛。白龍須鬣鬚。曩時李先輩。丘壑性所耽。過之不能去。思結小圓菴。點筆寫爲圖。買山付虛談。清河有一老。於此開徑三。詩壘黃蔑樓。生壙金粟龕。偶占絕勝地。戶戶圍重嵐。漁洋峙厥左。層波激澗澗。其右浮者六。一一同眠蠶。所憾溱浦隔。未得窮幽探。徒羨漁子艇。揚帆捉羸蚶。張郎敬愛客。託契來僑鄰。園蔬進香飯。家釀發新坩。彭鱸列瑣細。橙橘分酸甘。主賓迭相勸。力飲忘身酣。是夕陰復晴。淨洗雪曇曇。花光暝逾蒸。四坐聞醜醜。牽吟共鬪韻。語笑吳越參。酬和繼沈范。少長齊羅聘。禮從野人野。嗜比貪夫貪。昂參橫醉後。各各猶研覃。回憶平生游。斯集樂且湛。擬留信宿居。懶上白竹籃。

初二夜月聯句

古今詩 十九

二月哉生明。華亭高不窳。查客曆象古無易。長洲顧嗣協。迂客云何期未屆。吳江徐鉉。電發忽露一鈎白。嘉定張大受。日容纖纖玦兩頭。彝尊遠遠眉半額。長洲顧紹敏。嗣宗驟剖老蚌胎。吳縣徐葆光。亮直乍吐妖暮魄。秀水朱甫田。襲遠拉折金臂環。崑山徐昂發。大臨屈曲玉牙尺。長洲顧嗣立。俠君仄痕浸湖波。長洲張士俊。籲三初輝澹林隙。長洲鄭鉞。季雅趁霞射東崦。長洲蔣深樹。存逐景度西磧。嘉定張士琦。天申偃蹇桂樹枝。不窳踟躕仙人跡。嗣協市看越鳥將。鉉喘笑吳牛亦。大受於焉拓風簾。彝尊恰喜映瑤席。紹敏玲瓏閣外梅。葆光淨若曳霜帛。甫田暗水流其間。昂發積素影活碧。嗣立廣寒八万户。士俊料愛惜花客。鉞預使千里光。深冷沁凍蛟脊。士琦亟催簫譜修。不窳恣把餅泥坵。嗣協或舉深杯邀。鉉或持紺法測。大受維衡運疾遲。彝尊猶人命通厄。紹敏先時天不違。葆光翁者耆焉闕。甫田勝引樂自今。昂發庶徵考疇昔。嗣立多耀由政平。士俊寢和驗寒革。鉞金樞落不知。深爛醉參橫夕。士琦

雲溪草堂圖爲徐進士永宣題二首

菱葉荷花蓼草磯。鶴巢深樹客來稀。主人且莫貪高臥。合試新涼柳汁衣。江城過雨不開雲。百里洮湖一曲分。比似玉河隄上望。柯亭劉井總輸君。

上巳後三日顧孝廉之璫招同諸公泛舟西湖卽事分韻得交字

獨權花陰入。重湖柳色交。斷橋亭蓋瓦。曲院水通坳。楚雀簧猶澀。江蓮葉尙包。宸游留翠墨。車馬隘春郊。

吳越武肅王祠觀表忠觀碑得潛字

一王三節返龍德半飛潛。尚有豐碑在。能摹活筆鉞。花開仍陌上。廟古逼城尖。霸業餘陳迹。思緇舊史添。
予注歐陽子五代史未就。

八日汪上舍日祺招同諸公夜泛五首

青驄斜日盡迴鞭。錦瑟中流罷合絃。誰似汪郎苦留客。夜深猶放總宜船。

湘湖遺老毛叟奇齡舊清狂。白髮相逢筍蕨鄉。已分今宵共沉頓。不妨跋扈少年場。

西冷橋外柳娟娟。宿霧迷濛月一弦。陌上花鈿如可拾。安知老子定無緣。

蠟燈何處送歸艎。一道萍開燕尾香。寄語紅牕休度曲。隔船回顧有周郎。

湖心亭子靜無塵。更上層樓算酒巡。好趁三潭涼月色。白銀盤裏采香蓴。

十日周上舍崧招飲晨過昭慶僧舍雨霽借諸君登舟循孤山沿蘇公隄至定香橋尋杖策歷大

小南屏觀磨崖家人卦舟回席上賦六十韻

山行有前期。晨起風雨惡。周郎衝泥過。促赴開沽約。車從酒庫來。航近寺門泊。同調六七人。畢來踐宿諾。
俄頃濕雲收。周遭露巖嶮。紉如津鼓動。解我青絲紉。隄緣水仙祠。柁轉巢居閣。已枯宅邊梅。何況墓上鶴。
徐集孫謁林和靖墓詩高風留塑鶴殘雨暗荒碑舍之度西冷。椒壁乍坊堊。長廊面積水。華構織新箔。云何丹粉外。團焦用綯索。

得毋法堯階。茅茨罷翦削。循此湖上洄。尋復步蘅薄。雙樹繚檐楹。層樓做櫺構。倒影碧重巒。殘英紅一萼。抽梭白魚跳。拂鏡翠羽掠。十亭此爲最。奇豈緣棧壑。同游興未闌。我心亦有託。思訪磨崖書。剔蘚試摹拓。篙師橫舟誤。道失墮蕭藿。俄聞南屏鐘。扶杖強趨趨。到院風滿林。松栝雜楊柞。客過僧不迎。去疾走矍矍。此輩廢耕畚。安坐享齋饌。何不勒歸農。驅使荷銚鍤。夕曛斷塔明。仰見飛鳥羆。起行十畝間。柔桑已沃若。修修綠筠竿。濕粉脫鮮籜。曲木橫爲橋。中以石填廓。苔磴側未安。賴有藤婁絡。頽齡苦足繭。十步九引卻。賈勇始一登。履險漸寬綽。石經早淪亡。餘者日銷鑠。家人卦六爻。何年此鑿鑿。曩借鉏菜翁。曹侍郎溶相攜共盤礴。彈指四十春。重過感今昨。流傳迂叟題。所喜未闕落。威鳳臆騰騫。乖龍爪拏攫。亟宜響榻回。悔失攜竹膜。字仿婁機箋。手學蔡邕摸。坐久暝色催。出谷下危約。平湖水悠悠。遠岫山漠漠。喚渡無緩聲。舉醕有逸爵。廚勅江庖烹。盤飮海物錯。紛綸算觥籌。稠疊進羹臠。吾衰僅兩齒。笑比牛軟嚼。於禮去煩苛。旣醉忘嗚噓。邇來數近游。今日樂上樂。雖殊梓澤敍。合繼蘭渚作。於焉迭觴詠。詩排硬語各。且當柅我車。入市趁櫻酪。主人洵好奇。語客君且莫。茲游縱可娛。所見但塗腹。詎足契真情。要必遠城郭。須爲裹飯交。選勝窮寂寞。兩峰躡晨梯。九鎖開夜鑰。行逢鹿銜花。臥聽禽擣藥。暇看樵子棊。雄對仙人博。子言我獨哂。其奈筋力弱。後游儻可陪。閉戶養腰腳。

顧十一孝廉嗣立載酒寓樓遂同夜泛三首

近郭新晴穀雨。故人載酒僧樓。商略今宵月色。一艘小舫中流。白鷺鷺拳一足。綠楊柳散千條。誰唱彎彎月子。赤闌干第四橋。蘇學士隄芳草。水仙王廟寒泉。正好當頭明月。莫緣半醉迴船。

偕諸君過靈隱寺雨宿松靄山房限韻二首

湖雲乍合山雨微。平岡細路風吹衣。過橋幾處輒塔湧。到寺一道巖泉飛。斬新白花蕊照眼。依舊青竹園開扉。攀蘿捫葛信公等。我與僧彌暫息機。正喜餘霞射東谷。何期簷溜滴階頻。且貪是夕翦燈話。判作來朝著屐人。慧遠酒邊能發興。周顛肉罷詎生嗔。貓頭之筍一飽足。況有青青鴨腳芹。

松靄山房六詠

四松徑

松子落五粒。松釵橫十尋。我來凡幾宿。夜夜警臯禽。

山茶院

一十四春風。一百五寒食。自開雪中花。至今好顏色。

清籟居

一夜雨鳴樹。不知雲幾重。推牕看曉色。對面北高峰。

西礪

山僧斲茯苓。洗此西礪水。宛轉流樹根。涓涓鳴不已。

栗園

布葉密如櫟。結實小於榛。時有芻尼至。翻飛不露身。

竹筧

流泉半嶺來。續以青竹管。穿過白花籬。忽注僧廚滿。

吳氏山莊牡丹歌

牡丹三本異凡骨。紫囊紅襖爭暄新。山家種此有方法。陳根淨洗無纖塵。徐量淺土壓深壑。旋摘芹芽除苔茵。要令植物生意足。不因得地長於人。我來恰值穀雨後。愛三百朵濃香勻。朱竿卓立張翠幔。游蜂舞蝶皆逡巡。日長狸奴慣癡坐。有時抱子來洗洗。分明橫幅趙昌畫。對此豁眼開心神。廬陵譜就種漸夥。或自曹毫移吳闔。天紅淺白僅盈尺。安得有此一丈身。我思來朝未必風不起。亟呼酒伴澆以饔頭春。

三潭采蓴聯句

明湖一鏡平。際曉光汎汎。繫尊三月抽香蓴。纖纖裹柔苗。馮念祖。吳儂戀鄉味。少小能識察。顧嗣立。擬荷

錢未圓。比苻帶尤滑。周敬差遜雉尾長。頗類蠶絲軋。吳陳瑛燕釵股天斜。鳧葵莖澡刷。周崧入掌溜螭螭。逆毛掩鷓鴣。馬翌贊當其采摘時。得一走七八。攀尊幾番誠漁童。百過迴櫓竅。念祖匪直手拮据。更在眼明黠。嗣立貯之老瓦盆。戢戢小魚頤。敬亟須下鹽豉。曾不費椒糶。陳瑛卽此足解醒。饑奴恣交夏。崧卻笑張季鷹。苦待秋風刮。翌贊

雨宿大仁院

徑轉雙林下。牕分半壁隈。築牆防虎穴。登閣儼螽臺。宿鳥翻風去。驚雷觸石迴。明當凌絕頂。導我一僧來。

石屋

大仁院北巖。窪中若廬旅。傾崖滴石髓。白日掠仙鼠。鑿佛大小軀。莓苔色黯沮。置身井谷中。窺天可倚杵。剔蘚辨留題。各自命儔侶。試觀咸淳書。筆縱字尤巨。白鴈雖未來。邊烽已先舉。奈何平章賈。志不在疆圉。貪領狎客游。子弟共容與。嫉惡性所同。見者費熏煮。不覩眉山翁。拂石埽雞距。愛惜爭摩挲。響搗硬黃楮。洞門石扇開。幽探少樺炬。慮拔千歲蛟。嶷然不敢語。山南殷其雷。驟雨沒沙渚。偶坐贊公房。夕陽滿平楚。

南山雜詠十七首

水樂洞

蒼山入夏寒。一泉自溫谷。其流浸蘭蕙。其音喻琴筑。砉然石扇開。飛出白蝙蝠。

虎跑泉

山泉可用汲。酌以長頸甌。虎跡久已湮。深穴猶窈窕。松陰轉三面。未肯回鞦韆。

煙霞寺

澀磴上招提。不知幾十級。入廚覓泉枯。過雨佛身濕。石乳滴空嵌。髣髴龍象泣。

風篁嶺

斷崖橫一嶺。穉竹何娟娟。時有山禽拂。新粉墮我前。欲尋巖下寺。揮我風中絃。

過溪亭

一亭四無鄰。棟壞柱已折。山僧慣迎賓。不忍過溪別。偶語莎草間。夕曛信明滅。

楊梅塢

我行楊梅塢。惜是孟夏初。是時果未熟。但見柯葉舒。思包綠荷飯。五月來精廬。

龍井

一泓淳山坳。過者不敢唾。雖然龍窟宅。亦許鬪茶坐。起摹襄陽碑。惜爲僧所斲。

片雲石

峰頭石縹緲。豈異一片雲。有時風雨過。獨立雲中君。安得五丁手。移置長水濱。

薩埵石

揭來給孤園。玩此薩埵石。石上生莓苔。千年暈濃碧。不見飮虎人。且鋪苾草席。

納翠山房

溪迴凡幾折。早已滌塵慮。靜看三樹松。深陰且箕踞。客去鶴飛來。客來鶴飛去。

九溪

尋遍十五寺。九溪鳴淙淙。下無一寸魚。上有百尺松。緣流思濯足。奈此菖蒲茸。

十八澗

暮經南山南。曲澗一十八。山橋往而復。山路塊兮北。夕曛漸催人。延首望香刹。

玉鈎橋

句曲一道士。愛住山之幽。褰裳慮深涉。賣彼白玉鈎。築橋訪詩侶。茲事宜千秋。

翁家山

岩岩翁家山。松花滿深塢。村民高下居。少長齊捕虎。但誇弓弩強。不識耕耰苦。

桂隴

桂樹花不實。何年種山椒。良由山中人。歲暮不自聊。殷勤與我期。秋日來逍遙。

理安寺

三家村裏人靜。獨木橋邊路叉。竹響驚回鼯鼠。泉香流出松花。

冬花厂

我愛僧房亂石堆。短籬笆護妙香臺。不貪夏果楊梅熟。恣看冬花盧橘開。

馮孝廉念祖招飲北園分韻卽送其同周崧入吳

故人襖被下吳淞。且復官泥圻酒封。主客不知何者是。登臨未覺老夫慵。池邊灌木陰千尺。郭外晴山翠幾重。有約豁亭宜避暑。迴船試共采芙蓉。

酬洪昇

金臺酒坐擘紅箋。雲散星離又十年。海內詩家洪玉父。禁中樂府柳屯田。梧桐夜雨詞淒絕。薏苡明珠謗偶然。白髮相逢豈容易。津頭且續下河船。

題春郊浴馬圖

兩頭纖纖駢角弓。半白半黑浮雲驄。酒壚未醉莫歸去。最好春郊楊柳風。

題初白菴主小像

玉臺舊鏡已塵昏。何處驚看雪鬢痕。頗似琅山查長老。新涼可有副衣存。查龍圖寓居常州琅山寺。躬事薪水給衆。人稱爲長老。嘗與程

宿留旅舍。盜取其衣。呼宿曰。衣有副乎。當奉假。盜聞之。棄去。菴主近泊葑門外。爲盜所劫。故及之。

題丁明府秋江垂釣圖

秋原兮蕭條。秋雨兮漂搖。西風悴兮梧葉。南山落兮豆苗。園無棗兮纂纂。田有莠兮驕驕。之子兮移家。寄情兮雲壑。爰理兮釣綸。蔽之以漁箔。衣獨速兮青蓑。笠天斜兮黃箬。一艘兮雖小。亦足兮載書。采風兮媿雅。暇得酒兮烹魚。信斯圖兮可樂。惜榛蕪兮西湖之居。

寄樂平石明府爲崧

天開彭蠡瀦南邦。石墨峰連羊角雙。近說循聲過朔郡。明府舊宰靈丘定知詩派壓西江。晝簾茗莢香聞竈。夜閣琴絲月滿牕。望眼側身非一度。相思聊復采蘭芷。

題李上舍騎牛圖

騎牛恣所適。不在郭椒與丁櫟。試看圖中人。出郊穩踏芳草春。春風暖拂堤上柳。柳外青旗定應有。可惜偏提不在手。南鄰朱老儻見尋。勸爾沙頭一壺酒。

玄默敦牂

少宛堂

小宛堂階梅兩枝。疎花點點映清池。分明馬遠圖中見。只少楊家妹子詩。

題洪上舍傳奇

十日黃梅雨未消。破牕殘燭影芭蕉。還君曲譜難終讀。莫付尊前沈阿翹。

水帶子歌爲喬孝廉崇烈賦

水帶子。環外虛其中。九州以內制器不及此。得非來自日本東。刮磨者匠。髹者工。惟智創物。變乃通。置之兩腋下。絡頸雙青纓。中流踏浪如御風。過涉不愁滅頂凶。勝壺千金樽五石。溺人一笑可以生我躬。喬生手攜是物訪我梅會里。自言來自射陂水。黃梅時雨水稽天。甓社湖流人罷市。無朝無暮慮覆舟。且喜今朝得到此。挂之駝鉤壁上懸。與論往事增淒然。初聞淮南減水垣開設。天子謂是一垣一口決。俄而僉謀滋異同。爾考直前奏事真剴切。迄今黃流泛濫軫帝情。鴈戶豈得安其生。桃花春水縱不發。河隄使者毋遽誇平成。吁嗟乎。河伯不仁亦無害。準備家家蓄水帶。

送張士琦令永新

春草烏斯道。長洲陸子餘。由來循吏傳。頻見永新書。送爾之官去。牽絲製錦初。秋山日蒼翠。詩卷共清疎。爲宋巡撫華題李營丘古柏圖

毘陵董啞子。不畫山畫水。淮陰龔高士。不畫人畫鬼。乃知負絕藝。落筆恆自矜。獨立萬古意。恥與時爭能。試觀營丘畫中柏。宛似青牛道士井邊植。一株足敵一百株。數尺看成數千尺。樹根有泉亦有石。樹旁有

草亦有棘。當時畫柏不畫松。檜葉縱身更奇特。商丘副相寶之久。是日從容出娛客。滿堂觀者齊動色。濃香亟就棐几熏。韋偃畢宏畫不得。此樹不知凡幾年。童童有若車蓋然。吟窩東北池西偏。玉鴉又挂逾清妍。期我體物賦長篇。往年文康公。晚作孝陵輔。君臣相悅邁曩古。和調文武致太平。賜予圖書出內府。郭熙范寬真蹟存。猶載香廚舊時譜。公今鑿賞多逾精。暗中以手摸絹可辨宋元明。閒來論詩兼論畫。過庭才子迭品評。三吳開府近一紀。盡收江表詩人作弟子。只如髯也亦是詩中豪。家石泉明府載震惜我和歌今老矣。

何孝廉噉荔圖

吳中才子過閩中。扶荔園開曲曲通。小榼都籃餐不盡。惜無人爲擘輕紅。

觀劇四首

四照亭開桂樹叢。夜涼風細蠟燈紅。人間亦有霓裳曲。絕倒吳趨老樂工。
三徑秋花高露新。重攜酒伴過城闌。只應夜夜西江月。留照筵前舊舞人。
燭下清歌楊叛兒。手世團扇謝芳姿。勝他幅幅纏頭錦。賺得張郎拜月詞。謂孝廉大受也。
歷歷羊燈樹杪樓。恣修簫譜散觥籌。龍鍾莫怪尊前客。弟子梨園也白頭。

題家廣文端鄧尉尋梅圖

村村梅底鬧壺餐。莫笑先生苜蓿盤。桃李漫山都不戀。冷香合讓冷官看。

慧慶僧房雪中聯句三首

柏

寺門柏二株。華亭高不驚。老榦等鐵石。我來七月留。華尊蒼翠陰。日夕。今晨啓牕牖。武進徐永宣學
人忽訝冷光射。漫天雲萬里。到地雪一尺。不驚庶物齊癡肥。華尊此樹獨寒瘠。疊葉剩鏤青。永宣交枝巧
剔白。盤坳挺鴉叉。不驚瑟縮偃蛟脊。根封雪窖銀。華尊身曳全匹帛。夫豈本性然。永宣偶爲造化役。空廊
立移時。不驚目眩肌疼痠。牀頭倒餘醞。華尊相對且酣適。扁舟泛未能。永宣悵望遠行客。不驚

是日汪份張大受汪

釣公車北上。欲送未果。

玉蘭

雪後玉蘭樹。華尊二本何勻停。居然華林闕。不驚卑鉢羅滿庭。雖無裂鼻香。永宣照眼光瓏玲。重重傅瑤
粉。華尊寸寸排銀釘。有時風吹墮。不驚素影逾娉婷。交枝露綫霑。永宣千苞壓繩櫃。色殺辛夷紫。華尊體
變珊瑚青。因憶虎丘北。不驚斜柯倚巖扃。歲久嗚其腹。永宣吐萼猶豐馨。此時更奇絕。華尊乘興思開舲。
惟愁凍塗滑。不驚況復密霰零。不如雙樹底。永宣淡坐憐忪惺。華尊

山茶

海紅亦嘉樹。永宣恰與小牕對。十月已試花。不驚娟娟良可愛。孤根託招提。彙尊冷豔免簪珮。曉起雪漸深。永宣我心始焉悔。既慮苞蘖摧。不驚兼恐顏色退。孰知歲寒姿。彙尊凜冽性所耐。譬蒙縞素衣。永宣媯然逞餘態。畫師貪此景。不驚往往入圖繪。或描江梅並。彙尊或取水仙配。分明黃趙筆。永宣只少鶉雀隊。寫生貌遜真。不驚比調朔繼晦。芳菲正有時。彙尊改歲游可再。永宣

聯句題王處士畫折紅豆圖并序

東禪寺紅豆一本。結爲連理枝。高至三丈。花時沈啓南。文徵仲。唐子畏。湯子重諸君。恆修文酒之會。後爲疾風所拔。王處士武。以水墨渲染作圖。妙奪天真。適有餉束筍者。并繪之樹底。圖今歸張孝廉。挂之橋下小軒。孝廉屬題。興到聯句。兼憶亡友惠吉士。周惕。成十二韻。康熙壬午涂月。秀水朱彙尊。錫鬯識。

吳赤烏年寺。嘉定張大受。日容相思子一叢。葉參雙塔外。華亭高不驚。查客花豔八門東。照影清溪水。寺舊有清溪堂彙尊題詩白石翁。甌香茶竈熟。岷山徐昂發。大臨徑轉麴車通。結實收新雨。大受調禽付短童。經行消晝日。不驚開謝幾春風。惠子居相近。彙尊王郎畫最工。偶然濡淡墨。昂發率爾變輕紅。破萼天桃似。大受披圖束筍同。已無枯樹在。不驚長恨舊壚空。賴有淋漓筆。彙尊能移造化功。祇應懸素壁。昂發吟賞小軒中。大受

雜詩二十首

淮陰一登壇。風雲色寥闊。囊沙齊遂破。立幟趙斯拔。羽也縱英雄。氣盡豈得活。大統歸赤帝。鴻溝因罷割。何哉雲夢游。一旦真王奪。始焉將百萬。目中無布越。既與噲等伍。國士已羞殺。寧知論元功。後乃及蟲達。焚香戶庭中。逐臭者在外。彼自海畔行。於我尙無害。所嗟蘭蕙鉏。盈要服蕭艾。荀揚世所賤。孔孟乃飢退。無鹽入齊宮。明妃去漢塞。物理固自殊。時運寧有待。愛者終莫憎。憎者不復愛。含沙難匿影。貝錦無停機。一爲讒言中。聽者弗復疑。我欲指天陳。畏見南有箕。小雅七十四。感彼青蠅詩。芳蘭生當門。託根豈能久。嘉禾徑寸苗。拔萃讓萋莠。蛾眉一入宮。謠詠但言醜。匪畏妒人工。所憎二五耦。雕陵有飛鵲。定巢上林枝。不愁風雨漂。寧慮矰繳施。雄鳩特佻巧。側目從旁窺。一朝逐鵲墮。公然來居之。搖頭鼓翼鳴。喚婦舖其兒。身無鳳凰德。飲啄鳳凰池。非所據而據。終爲百鳥嗤。紅亦不復花。白亦不復花。堂前雙梅樹。但有枝杈枒。春風吹戶外。好鳥鳴鄰家。嗟我寂寞人。故里同天涯。淮王升天日。對帝稱寡人。始焉帝心眷。既乃帝怒噴。謫歸小山中。桂樹枝輪囷。居然盜帝書。意欲垂千春。河間禮最古。楚元詩亦醇。區區服食方。咄汝非其倫。九師招不至。且與雞犬親。夷羿射十日。其九落高穹。如何此神術。迺以授逢蒙。支左與詘右。於技無不通。一朝突反射。人鮮克有終。嗚呼在三義。有若日在中。六經各有師。不及斷椀工。昔賢服心喪。期與生我同。薄者無不薄。奚事鳴鼓攻。秋蓬本在下。吹噓送上天。回風崇朝至。過我門梁邊。假令一者來。何妨暫周旋。奈何舍我去。轉向斜徑穿。

不如楊柳花。相近猶纏絲。涼燠有定候。冰炭毋乃偏。

昔有池仲魚。移居城門下。城門設重關。際夜上銀鎖。既無穿窬患。兼有擊柝邏。自謂智慮周。乃藏殺身禍。烈燄已具揚。撲滅勢不果。吁嗟骨用朽。前事資驗左。處世多危機。衝波少安柁。桑海詎難乾。杞天亦可墮。宋鄭四國災。咸秦三月火。達人般遠憂。朝市足恆裏。逍遙十畝間。爲樂無不可。華山有小鳥。自名寒號蟲。翻飛必自卑。毛羽恆不豐。物微免弋獲。幸得過凜冬。一朝條風至。自詡時命通。洗頭玉女盆。鼓翼白羊峯。謂鳳不如我。聽者誰汝容。鳳兮翔千仞。覽輝下梧桐。一鳴音節節。再鳴聲噦噦。雖言德之衰。物理豈終窮。

千佛各有經。翻譯滿禪闕。山花木葉文。繁重苦難括。自從達磨來。一葦當津筏。聰明主妙悟。指授在呵喝。不讀一字書。猊坐立可奪。奈何君子儒。語錄效緇褐。讀古喻玩物。斯言太拘閼。聖人述六藝。反正亂可撥。豈惟身獨善。言動必迂闊。張口雲霧中。昏瞠何由豁。庶幾經濟才。寇虐乃能遏。

有酒斯鼓缶。吹壎必和篪。同調定見憐。一心不相離。古人重久要。隙末非所宜。谷風思小怨。大德反棄遺。新交不如故。君子當三思。請看蘇子卿。豈絕李騫期。

蘇秦六國印。主父四鼎食。積金已成穴。多方猶采獲。人壽無百年。子豈神仙籍。蜉蝣語螻蛄。我今日將夕。春秋爾易邁。不樂良可惜。

衡必錙銖爭。錢必子母權。佳李鑽及核。曲防遏其泉。不屑一毛拔。而況千金捐。舉世皆楊朱。方思墨翟賢。飛蟲揚其羽。乃爲蛛網得。白鹿游上林。難免射工食。君子慎所趨。毋以貪自賊。不見冥冥鴻。寧受弋者弋。佛法西域來。道里實遼遠。其徒祇比丘。馬馱經數卷。至晉始有尼。入梁俗莫挽。此輩僧易狎。爲態亦婉婉。一入富家門。內言出於柵。挾伴湖山游。積金寺塔建。精舍累百區。有司豈能限。宜淫青豆房。飽食香積飯。因之壞風俗。詎可偕息偃。婦人有婦功。蠶織乃其本。如何水田衣。娑拖出祇苑。跪拜學男兒。對客不自忖。誰修鳳樓識。絕此毋往返。

先王設庠序。專以明人倫。校官爲人師。必先順乎親。入貲稱博士。母也情所欣。雖有祿三簠。莫具膳兼珍。九品流未入。自詡爲王臣。板輿道豈遠。忍自柅其輪。彼心誠泰然。我見翻愴辛。

東京厚風俗。士行本學校。必先親其親。使民知則倣。於時重喪紀。期功相答效。至或自解官。居憂立名教。奈何今之人。母死不作孝。舍爾直經製。有醜酒肉貌。首丘死者狐。首山死者豹。鮮民之不奔。曷月掩泉窖。誰哉生厲階。仕路巧騰蹕。

男兒一墮地。弧矢射四方。家有驥千里。豈戀苗藿場。威鳳鳴啾啾。千仞肆翱翔。覽輝一以下。百鳥生儀光。圈牢有養物。毛鬣分柔剛。留以施刀俎。逸欲終見殃。駛景洵易馳。安樂不可常。奈何當盛年。白晝處帷房。

曝書亭集卷第二十一

古今詩二十

昭陽協洽

盛秀才書齋觀文嘉水墨杏花新燕

宣和譜花鳥。獨有燕子畫者少。後來小屏山。多寫白燕梨花間。大都畫粉不畫墨。又或畫雙不畫隻。吳中才子文休承。藝事三絕人共稱。冰紋之繭恣留額。新燕圖來剛一尺。其餘盡寫石田詩。不許觀者旁題辭。梅湖盛生雅好事。少長羣賢並邀致。晴軒挂壁縱客看。歎息滿堂聲不寘。圖中烏衣甫出巢。杏林過雨含香苞。拂羽試飛力尙怯。風前未遽踏花梢。自來寫生手。往往守窠臼。惟有石田真軼倫。同時絕品數唐寅。兩君畫意不畫似。嘉也此圖亦逼真。吾衰應酬詩嬾作。去聲只愛看畫題長句。坐中妙繪六七公。那不臨摹遺我茅堂中。搖頭鼓翼尾涎涎。令我日日長相見。

春暮看花木瀆夜過上沙連雨不止信宿還慧慶僧寺左足病躄自慰二十韻

春游抵木瀆。對酒愛晚晴。際夜泛上沙。俄頃風雨生。屋東西溝水。漉漉階除鳴。繩床承漏瓦。三徙仍欹傾。淫潦晝不已。疾雷暮砰訇。有蚓蟠青泥。有菌抽黃莖。置身雲光中。濕氣易滿盈。老夫留信宿。臥起足疾嬰。

其左頓成蹊。其右安得蹊。推牕覽朝霞。散作魚尾鱗。言辭主人去。淨域返水精。兼旬罷看花。累月不入城。父母生我來。日月斯邁征。紅塵早插腳。重繭萬里程。雖經侍班聯。曾不伺公卿。旣嬾著朝鞞。兼恥邪徑行。一從罷官後。誰復驅使令。不妨日蹒跚。堅坐無所營。吾自著吾書。吾自怡吾情。不有習鑿齒。足蹇春秋成。

苦熱和梅都官韻

于垓鶴不鳴。涉波豕潛逃。不有膚寸雲。焉得陰雨膏。徒封蜥蜴甕。未毳烏獸毛。旣乏招涼珠。詎有含風袍。良苗日以槁。莫抽分寸毫。夏畦病莫治。秋乃亡其曹。老翁愁旅食。疾首虛爬搔。廣廈尙苦熱。何況層樓高。夏日病足留。慧慶寺張顧二孝廉孫范二上舍徐陳范汪顧五文學載酒至席上譚藝率賦二首

一人半爾習鑿齒。三樂具焉榮啓期。老矣關心無俗事。相於把酒判深卮。風多盡卷桔槔水。旱甚將枯蔗芋陂。已辦衝泥油竹傘。當筵頻起祝雲師。

近聞天子幸捺鉢。闕下諸司務暫休。吾意最憐雙樹好。諸公合近五湖游。形模楊陸詩焉用。服習曾王筆自逾。五相一漁朝野別。不知何者果千秋。

初秋宋五進士聚業載酒過張三孝廉大受潮生閣送魏二孝廉坤之西江卽席分賦得九言

今年六月不雨至七月。小軒橋下恆苦水氣腥。昨宵高荷大芋聽枕畔。歷頭檢點白露今朝零。武塘魏二舍我豫章去。鴨觜小艇蚤繫菰蒲汀。此時攬袂欲別不忍別。卻喜南園酒載雙玉餅。匠門羣從同調三五

客長歌短詠搖筆無留停。此時秋之爲氣感宋玉。碧梧桐猶未落。蘼蕪青。潮生閣梯從一初。桃上八牕盡拓。四面風泠泠。灌嬰城中本吾舊游地。中有古井浪動連宮亭。珠簾畫棟亦有帝子閣。目極西山南浦無潛形。人生快意豈必致通顯。文章一技可以垂千齡。桓山石椁縱使九泉錮。詎若閉關頌酒生劉伶。他時寫取水村圖第七。容我拄杖剝啄叩門扃。

橋下小軒對菊效陶

商風拂昧谷。翳日浮雲移。晚節菊有芳。不隨蕭艾萎。黃白愛並列。朱紫或間之。雖乏有皖實。沃沃呈其姿。主人治席硯。弟子前摛辭。抗論孔壁書。兼詠伐檀詩。吾亦扶杖至。逍遙循階墀。良久發清謳。妙舞堂中施。三爵客多又。一觴我同持。人生如噩夢。境適且自怡。今者若不樂。將爲四座嗤。

題喬孝廉崇烈書離騷

伯時圖九歌。和仲書九辨。昔賢愛楚辭。重之若笙典。舍人工楷書。法在去肥輒。三真六草間。用意帶章篆。年來日臨池。真蹟滿巾衍。離騷思所寄。一寫一百卷。吾思屈子才。妙語恣抽演。美人與芳草。發興義微顯。靈修美始合。改路忽他踐。藝蘭磐石阿。終憾託根淺。一旦化爲茅。遂爲蕘豎翦。冶容非不工。其奈出辭審。揚蛾衆女前。謠詠詎能免。水流豈復回。石爛不可轉。斯人久沉湘。心事爾能闡。想當懷伯庸。以茲費藤繭。紙長三過讀。令我亟稱善。冷笑書洛神。取義毋乃舛。

題梅生庚詩臺

吾門著錄多。梅生文載道。昨朝寄來詩。彌覺風格老。清琴一高張。羯鼓罷勿考。羣雅百五篇。足以豁懷抱。

闕逢涪灘

齋中讀書十二首

周官掌三易。以通天下志。卦名或不齊。旅占本一致。豈有先後天。瓜離異方位。斯言偽且堅。足以亂神智。演為方圓圖。申以河洛義。儀象卦已陳。相錯六十四。圖中迭相生。十六三十二。請問安樂翁。正名名焉寄。

太極非有象。一元氣渾淪。陰陽至精數。義由道士伸。列圖自下上。三五理具陳。陳子昂詩。太極生天地。三五

誰能徵義見道。番番希夷叟。以此勒貞珉。元公一丁倒。遂為席上珍。陳搏無極圖。倒易。元更廢興。至精亮斯在。三家洞真元妙經。

復辭紛綸。仲尼不可作。誰與別偽真。

書名達四方。掌之周外史。曷言乎書名。毋乃小序是。馬鄭注漆經。大義已及此。古文雖未見。序先暢厥旨。

云何宋諸儒。深文共排毀。書序非孔子作。其說始林之奇。吾聞國史言。序書自孔子。哀哉秦火後。未亡亦僅爾。苟屬聖人

言。亦當存其似。不見小戴文。禮家以取士。何獨詩書序。攻者後先起。

九疇一五行。洪範義先具。伯鯨一汨陳。維帝乃震怒。啓賢能繼禹。天罰行有扈。桑門易地風。其說本舛互。

奈何洛下儒。侮聖不知懼。用三革其二。變一成百悟。既與洪範殊。寧免彝倫戮。百世而可欺。君子亦有惡。

孔門善說詩。子云商起予。流傳大小毛。授受大小序。縱有齊魯韓。見之色斯阻。夾漈一後生。攻以烈火炬。先儒誤聽信。鑿柄生齟齬。微言忽中絕。大義不復舉。聞人左丘明。著書秦相呂。其言雖近誣。其事頗足取。國僑賦褻裳。晉爲退師旅。木瓜美齊桓。情豈係男女。詩教厚人倫。誨淫何獨許。可怪上蔡師。魯齊王氏爲上蔡書院師爲力亦太鉅。芟棄鄭衛篇。竄改雅頌所。王氏擅刪鄭衛諸篇。又退召南野有死麕。入王風。而以譚大夫衛武公詩改入國風。誰爲辨異同。復遵箋傳語。

男女一相悅。情迫莫自持。不聞桑中契。先以定情詩。國史明得失。輜軒別醇疵。如何歷鄭衛。專錄淫人辭。雞鳴風雨夜。奔者亦可危。執袪遵大路。豈不畏人知。丘中有麻麥。兩雄共一雌。雙雙李樹下。寧免相詬訾。立言詎可訓。說者宜再思。無邪尼父教。用告童子師。

詩亡王迹熄。百國有春秋。魯叟乃筆削。寶書肆旁搜。晉乘楚檮杌。鄭志亦見收。斯爲天子事。邦國合九州。大書王正月。恐疑於孟陬。胡氏逞私智。謂以夏冠周。豈其一布衣。斧鉞威諸侯。美惡同其辭。此言尤謬悠。當其在講幄。君臣意綢繆。經義月經進。諷諫同轉輟。是時十將存。可復二帝讎。奈何戒黷武。惟知安是偷。得毋檜所薦。知己士當酬。流傳誤後學。乖舛難悉糾。曷不廢其書。述事準左丘。素王六經外。論語其總龜。紀者六十四。義取春秋辭。同門有不善。一一具書之。由求予亢寮。言失不可追。揆諸朋友義。情得徇其私。寧形弟子短。但以尊先師。試觀孟子徒。克丑亦若斯。後儒不曉事。吹毛務求疵。

倡論輟從祀。平反者爲誰。不若鄉愿人。非刺無可施。瞽宗祀此輩。衆口庶不訾。吾思屋上烏。愛由丈人推。云何七十子。一皆罷其祠。何年復舊典。俎豆勅有司。

漢士守一經。其義或駁躅。真儒起北海。卓哉鄭司農。博綜六藝旨。叩之等木鐘。於時內外學。罔不羅心胸。

用以釋儀象。明堂暨辟雍。初非尙怪異。專一譚魚龍。緯書河圖。魚龍最怪。至於五帝名。亦惟祀典從。德業旣日尊。弟

子爭扳逢。黃巾拜車下。後儒翻不容。一朝輟栗主。俎豆何由供。嗟彼黎丘鬼。謂王通也。乃以祀瞽宗。

秦延君說書。敷文太支蔓。堯典僅一篇。爲言且三萬。博士賣騎驢。亦費三紙券。吾思吉人辭。終與躁人遠。

辭苟足以達。其義自繾綣。忽狗買菜求。第抒心所願。不見陸士衡。才多反爲患。

詩篇雖小技。其源本經史。必也萬卷儲。始足供驅使。別材非關學。嚴叟不曉事。顧令空疎人。著錄多弟子。

開口效楊陸。唐音總不齒。吾觀趙宋來。諸家匪一體。東都導其源。南渡逸其軌。紛紛流派別。往往近鹿鄙。

羣公皆賢豪。豈盡昧厥旨。良由陳言衆。蹈襲乃深恥。云何今也愚。惟踐形迹似。譬諸芳蔗甘。含漿噉渣滓。

斯言勿用笑。庶無乖義始。

羣雅日凋謝。後起靡有涯。奇觚累百人。各自名其家。吾衰尙有志。道古閑詖邪。有明三百禩。攬秀披春華。

青田與青丘。二美洵無瑕。吾鄉數程貝。雙珠握靈蛇。自從永宣來。其辭正且葩。泊乎嘉靖季。七子言何夸。

鈎金縱可揀。莫披黃河沙。一咻衆楚和。是後尤卑哇。先公聞缺舌。頓生亡國嗟。先太傅初聞袁中郎鍾伯敬論詩。歎曰。安得此亡國。

之音。慘然不憚。吾欲返正始。助我者誰邪。

雨中從銷夏灣汎舟泊石公山麓

縹緲峰頭雨。飛來銷夏灣。舟停給孤寺。路轉石公山。吹浪神龜老。迎人吠犬獠。七檣帆百幅。最樂是魚蠻。

林屋洞二首

洞天傳第九。林屋是吳根。地戶眞官守。塗泥太古存。雜花春瑣細。仙鼠晝飛翻。二客思深入。囊衣換犢羶。

謂馮孝廉念祖。胡上舍期眞。

出谷衣爭曝。盤坳炬已灰。仙居無路到。石扇幾時開。題壁思前事。洞口有亡友周貧題名。窮源誠後來。不如神景觀。

松下且徘徊。時攜沈生翼。徐生惇復。息道院中。

太湖眾船竹枝詞十首

村外村連灘外灘。舟居翻比陸居安。平江魚艇瓜皮小。誰信眾船萬斛寬。
具區萬頃匯三州。點點青螺水上浮。到得石尤風四面。眾船打鼓發中流。
黃梅白雨太湖棧。錦鬣銀刀牽滿罾。盼取湖東販船至。量魚論斗不論秤。
幾日湖心趙趙風。朝霞初斂雨濛濛。小姑腕露金跳脫。帆腳能收白浪中。
灣頭茱萸紅十分。湖中鷺鷥白一羣。儂船縱入采菱隊。不濕青青荷葉裙。

十歲癡兒兩髻梳。漁娃不放柁樓居。新年判費金三鎰。聘取村夫子說書。
權郎野飯飽青菰。自唱吳歛入太湖。但得罾船爲贅壻。千金不羨陸家姑。
東溟大鴈也嗟哉。滅渡橋頭銜尾過。一樣風波湖海別。黃魚爭比白魚多。
船頭腥氣漉魚籃。船尾女兒十二三。染就纖纖紅指爪。新霜愛擘洞庭柑。
莫釐峰下鳳舟回。望見高帆六道開。傳語羽林郎莫射。漁翁元爲進鮮來。

題楊賓浮瓠圖

柳條邊兮不知幾千里。有懷二人兮游子戾止。松花江兮不可方思。浮以五石之瓠兮。勝一葦之杭之。嗟
世兮嶮巇。投吾足兮安施。仰瞻兮厓巖。憚赤豹兮文狸。遐眺兮崇期。車或殆兮馬隤。遵陸匪安兮。溯流匪
危。竹杖乍釋兮。羽扇斯麾。我覽四方兮。孰是周才。若濟巨川。其髯也哉。

題文處士點山水

去年金侃亡。今年文點逝。誰修遺民傳。念彼宰相系。舊游章君存。早結僑札契。示我水墨蹤。巖壑最清麗。
髣髴黃鶴樵。浮嵐轉澄霽。僧樓架木杪。想見舊所憩。下有宛轉橋。得非寒山澁。陶陶永夕話。歎息何由繼。
竺塢瑟旣輟。山陽壚已閉。對此神默傷。寸心實悽戾。題詩卷還君。藏之永勿替。君自挂君圖。吾亦制吾淚。

同徐吉士昂發陸上舍穉沈秀才翼過普賢僧房

茶塢山根寺。經營景定年。尙存行在牒。未改梵王筵。竹覆空池冷。松排老樹圓。天平知不遠。留酌白雲泉。
謁韓蘄王墓

蘄王墓近古梧宮。暨六夫人耐葬同。尙有石甓眠宿草。更無宰木動悲風。朝端彈事憑汪藻。身後碑文付趙雄。輸與喪師張魏國。史家具狀得徽公。

明瑟園雜詠三首

黑雲墮地晚風號。賴得山棲置屋牢。不特高梧新乳落。吹殘皂莢認瓜刀。
石橋夜夜雨傾盆。茶塢雲多不露根。檢點牛宮與豚柵。莫教新漲入蓬門。
竹外秋葵黃淺淺。池南夏木綠陰陰。日斜愛客絃桐至。翻恨山蟬處處吟。

八月十五夜陸上舍穉招同張孝廉大受徐吉士昂發顧孝廉嗣立徐上舍惇復沈秀才翼翫月

石湖席上作

海湧東西寺。笙歌鬧梵臺。陸郎呼小艇。且喜石湖來。七十二橋月。流光上酒杯。浦禽鳴不去。勸客莫先回。

逢廬州守張純修四首

瓜州東廡徹離筵。並坐空江赤馬船。君去我歸京口牖。春鷗秋蟀十三年。
潭柘山游舊侶稀。每逢鄰笛一沾衣。懷君千騎廬江郡。日對東南孔雀飛。

伍胥門外泊齋舫。話舊纏絲客共聽。幾度相逢秋水曲。黃花籬落白蓮涇。
四百南朝寺錯連。借君一榻坐蕭然。龕中彌勒應微笑。太守輸他布帛錢。

同曹叟話舊三首

斜街深樹早涼生。樹底娑拖伴我行。猶記書堂酒醒後。月中吹笛到天明。
長定花時鬪酒籌。周郎三爵足風流。縱然紅藕紅薔在。二人皆周郎中侍兒。叟授曲女弟子也。誰復嬌居燕子樓。
戟府沙隄路渺茫。十年蹤跡寄滄浪。白頭再過僧廬坐。共話中山獵後狼。

旃蒙作噩

詠白杜鵑花應東宮教

銀榜璇題一道通。仙花移植冠芳叢。色殊李白宣城見。狀比嵇含嶺外工。照水影齊紅躑躅。卷簾香動玉玲瓏。梯航萬里來何幸。采入瑤山睿藻中。

方乾木蓮花圖歌爲鐵夫上人作

少日誦九歌。芙蓉搴木末。得非三閭大夫本寓言。豈有江花樹頭掇。壯年草木多識之。乃知黃心之樹產自西北陲。母丘道士曾作畫。醉吟先生亦有詩。傳聞雖久虛增羨。膩粉輕紅幾人見。黃山山後鐵頭陀。示我生綃圖一卷。葉如青桂身青楊。花開朵朵青蓮香。天都方乾染初就。拒霜不數滕昌祐。我思此圖更百

年定有好事爭流傳。老夫爲題詩一篇。卷還頭陀須愛惜。慎勿輕污飛蠅點墨瓜牛涎。

題黃山鐵公小像

鐵公黃海至。曾占最高峰。山後一茅屋。階前萬壑松。禪心離怖畏。詩卷閱春冬。不信巖居樂。君看冰雪容。

戲題汪上舍□□拓盃小像二首

世無乞食僧。天女隨其後。莫是摩登伽。巧把阿難咒。歡喜阿羅漢。精藍舍衛城。山僧少拘束。恣意蹋花行。

焦山別銘圖爲王副使煥作

華陽真逸昔瘞鶴。井穴乃在焦山根。銘文不省誰氏作。紀年第有干支存。審視要非唐後勒。昔年曾與張。詔論茲山不與浮。玉伍其地僻左稀。攀援旋渦轉湍奔。溜急沐日浴月驚濤翻。峰坳集海舶。浪齧藏江豚。銘辭汨沒露日少。誰抉地戶開天門。丈人守靈威。真官降趙尊。若非神人護。遺蹟安可捫。蘆臺王君信好事。躬自荷鍤操犢禪。剜苔剔蘚竟深入。先以前趾次尻臀。手摸其文無闕失。一紙價已當瑤琨。西江道士爲傳寫。衣袂尙帶寒潮痕。惜哉轅馬且北去。山游未遂枯與溫。何年金石共搜討。疑義相析窮其源。

題宋中丞迎鑾集二首

魚水君臣古不知。玉音問答宋胡忠簡公撰駐乘輿。近來官閣無留牘。更勅香廚校祕書。

西陂水比石湖清。雲漢天章照夜明。且莫平泉疏草木。試看馬乳後園生。

七夕詞六首

箕南斗北火西流。萬里明河一夕收。難得纖纖兩頭月。夜涼猶挂曝衣樓。
照面微虧半月輪。經年別緒暫相親。奔龍控鶴緣何事。天路翻多襤褸人。
中庭兒女上駝鈎。夏果秋瓜列案頭。若使天孫有餘巧。只應先乞自癡牛。
清淺河流次第看。橋成猶費立津盤。來朝試彈林梢鵲。驗取修翎乾未乾。
舊事虛傳摩喉羅。家家秋思問誰多。兒童免戴青荷葉。借我連筒卷白波。
馬乳蒲萄哈密瓜。吳儂一倍鬪繁華。街頭不復簪楸葉。但買山塘茉莉花。

曹通政寅自真州寄雪花餅

舊穀芽揉末。重羅麩屑塵。粉量雲母細。糝和雪餠勻。一笑開盤福。何愁冰齒齷。轉思方法祕。夜冷說吳均。

題朱顯祖梅花手卷

空裏疏花淡更香。珊瑚水底尺難量。只應翠羽三更月。臥看橫枝如許長。

贈卓處士爾堪

忠貞公後族蟬聯。一代遺民藉爾傳。辛苦遼陽存過所。其先世入關篝燈重話革除年。

初冬北郭讌集分賦

詩朋期不違。勝引情乍愜。潦看楚澤收。簷與蜀岡接。纍纍斂餘花。變變下涼葉。短景猶戀人。深杯轉稠疊。飲方觀園亭。卽送其入都。

隋苑頻移柳。吳歌罷采菱。平山窺戶入。遠水出郊澄。券尾驢三紙。霜羣鴈一繩。金臺行在望。樂劇許同登。時義興諸子執禮同行。

玉帶生歌并序

玉帶生。文信國所遺硯也。予見之吳下。旣摹其銘而裝池之。且爲之歌曰。

玉帶生。吾語汝。汝產自端州。汝來自橫浦。幸免事降表。僉名謝道清。亦不識大都承旨趙孟頫。能令信公喜。辟汝置幕府。當年文墨賓。代汝一一數。參軍誰。謝皋羽。寮佐誰。鄧中甫。弟子誰。王炎午。獨汝形軀短小。風貌樸古。步不能趨。口不能語。旣無鸚之鵠之活眼睛。兼少犀紋彪紋好眉嫵。賴有忠信存。波濤孰敢侮。是時丞相氣尙豪。可憐一舟之外無尺土。共汝草檄飛書意良苦。四十四字銘厥背。愛汝心堅剛不吐。自從轉戰屢喪師。天之所壞不可支。驚心柴市日。慷慨且誦臨終詩。疾風蓬勃揚沙時。傳有十義士。表以石塔藏公尸。生也亡命何所之。或云西臺上。晞髮一叟涕漣漣。手擊竹如意。生時亦相隨。冬青成陰陵骨朽。百年蹤跡人莫知。會稽張思廉。逢生賦長句。抱遺老人閣筆看。七客寮中敢吠怒。吾今遇汝滄浪亭。漆匣

初開紫衣露。海桑陵谷又經三百秋。以手摩挲尚如故。洗汝池上之寒泉。漂汝林端之霏霧。俾汝長留天地間。墨花恣灑鵝毛素。

柔兆閣茂

春日讀春秋左氏傳心非胡氏夏時冠周正之說偶憶草廬吳氏讀尚書絕句原詩前漢今古文論後晉古文今若論

伏勝功遺像當鑄金因用其韻

魯史王正月羣疑積至今丘明一周字直可抵千金。

題徐檢討鈿豐草亭六首

青竹槍籬白竹門。西濛不異舊時村。暮年庾信文章老。只合江關賦小園。
蓄意誅茅縛作亭。中央四角總虛樞。客來不用愁鰕菜。漁弟漁兄滿洞庭。
一簣平山一曲池。貓頭生筍菟抽絲。新來長得金光草。試問主人知不知。
春泥就燥雨初晴。百草千花一夜生。為報亭中宜對酒。不成送客反留行。
暇日娑拖一杖支。養生方法講多時。不應尚戀閒釵釧。棗木流傳本事詩。檢討方鏤板行續本事詩
登盤黃雀箭頭魚。誰道天隨子不如。近日欲傳糖蟹法。更來笠澤借叢書。

東禪寺林酒仙祠

仙長洲林氏子幼失水至嘉興為比丘祥符五年卒于寺僧居簡北碑集為作銘龔明之中吳紀聞述其事仙遺詩有門前綠樹無啼鳥之句

獨破珠林戒。惟貪米汁甘。醉鄉仍此地。古佛與同龕。北礪遺銘在。中吳舊事諳。門前留綠樹。過客每停驂。
憶高徵士不齋三首

苦憶蕁鄉一釣師。捉將官裏去多時。匠門自閉潮生閣。寂寞張爲主客詩。潮生閣在張孝廉大受園中。徵士至吳長泊橋下。主客時酬唱。
西華東望禁垣重。鞞底霜花曉更濃。料得簪毫趨朵殿。驚心怕後丑時鐘。
薊丘風雪最天斜。何處停車問酒家。此日聯吟遺一老。僧房獨對海紅花。

謁秦伯廟四十韻

沮漆尋源合。江蠻相士弘。古公遺哲嗣。內傳有明徵。肇迹貽謀遠。先幾脫屣能。帝心惟季度。祖武得昌繩。
句曲誅茅始。衡山采藥曾。屈伸等龍蠖。游息喻鷦鷯。三讓聲何忝。羣黎愛莫懲。稻田占樂歲。秦伯圍瓜戩田城內。瓜戩
啓新塍。洌井深堪汲。高墉近可乘。謳歌頓洋溢。獄訟省侵陵。化被仁風厚。經傳至德稱。宋徐僑請更論語名魯經。玉輿
初弗顧。黃屋詎難勝。陸雲碑。獄訟載歸。謳歌屢請。能舍玉輿之貴。永襲皮冠之迹。自鎬宗盟重。維南庶績凝。命圭還作伯。端委豈無朋。
節孰千秋並。名將萬代矜。苻子。太伯將讓國。語其傳曰。王欲吾嗣一國之事。世家倫序定。人表上中應。漢吾其羞之。吾聞至人不貴一代。而萬世以之貴。世家倫序定。人表上中應。漢書
古今人表。秦伯仲。雍均居第二等。地紀吳甄胄。見陸廣徵。祠沿漢永興。到門帆葉卸。門外開帆葉。倚郭殿檐層。行潦蘋
長薦。平墟墓未崩。友于同一廟。皮日休詩。一廟棲止必雙憑。熟食均籩豆。文身判股肱。獨存冠黼皐。不散
髮鬢鬢。史記索隱。引世本文。雍是熱食。故遜位翻追王。浮家乃誕登。典儀咸秩久。齋宿有司恆。芭舞經春

演靈旗練日升。官橋行坦坦。近廟有至德橋。社鼓奏鑿鑿。霸業諸孫歇。豐碑異代增。斗牛含氣象。烏兔信環緪。議

禮邦人懈。彌文俗吏憎。漸疎胞與翟。下遣簿兼丞。畫繪添奇鬼。潘凱記祠兩廡下。土妖木魅。詭形罔象。編氓乞福。膜拜乞靈。牲醪減舊

秤。但令巫史祝。罕覩蕙肴蒸。斷礎方花溼。空廊蔓草芳。青蟲晴挂樹。蒼鼠暗窺燈。邇者鳴鑿至。恭惟嘉惠

承。為章倬雲漢。題扁照柵棧。過客爭趨謁。其誰免戰兢。杏梁浮震澤。栗主配延陵。墜典勤分掌。同時范文正。程明道。

宗忠簡諸祠。降御書扁額。恩言盡服膺。法施民矢報。終古潔銅甑。

山塘紀事二首

寒食山塘路。游人隊隊偕。桁楊充臯隸。簫鼓導神牌。紅粉齊當牖。銀花有墮釵。殷勤短主簿。端笏立阼。類

叢租切。階。吳俗。迎城隍神至虎丘。道士以王珣地。主袍笏立阼。階延至厲壇。

神來官道擁。祝祭厲壇仍。活脫青袍引。縱橫繡幃乘。巫風書具訓。奢俗禮宜懲。手版紛紛集。吾憐張季鷹。

吳俗。土穀神城內外各十。多以手版迎城隍。張翰祠葑門外。亦與焉。

夏日雜興二首

五月新苗綠。上衣農人占。雨候荆扉。黑雲合處斜。光露無賴蜻蜒千百飛。

桐陰細細白花攢。吾愛吾廬暑亦寒。縱少圍碁消永日。也應騎馬勝鹿官。

題裝潢顧生動卷二首

梅邊亭子竹邊風。添種梁園一捻紅。不獨裝池稱絕藝。畫圖兼似虎頭工。過眼雲煙記未曾。香廚爭藉理籤籐。殘山剩水成完幅。想像張龍樹不能。

得三十五弟彝爵杭州書

司訓吾家弟。封書忽見招。紅荷花十里。開到定香橋。

寄訊龔御史翔麟

江橋卜築意。鹿安聞道田。居十畝寬。不使車塵喧戶外。儘容山色到簷端。燈前綠酒雙魚洗。雪後紅衣一釣竿。料得時巡春有信。種花應許上樓看。近年每逢車駕巡幸一至杭州。

送高佑鉅之江寧二首

塵衫破帽獨支筇。重向金陵寄客蹤。試上風香層閣望。至今猶剩幾株松。

青衿文字國門編。暇話姚翁結客年。翁字北若。念祖友壻。快意黃金隨手盡。秦淮一道擁燈船。

汪侍郎攜攜仲子日祺夜過二首

解纜童兒塔。侍郎從海寧至。抽帆長水村。劇談無夜禁。密坐覺冬溫。雀鮓披緜重。魚頭漉酒渾。回思燕市飲。凋謝

幾人存。

十載疎芳訊。崇朝去考堂。楚歌休憤恨。吳語自清狂。舊雨西牕在。空林朔吹長。阿戎飛動意。離席倒詩囊。

曝書亭集卷第二十二

古今詩二十一

強圍大淵獻

宿陸上舍穰聽雨樓

客鬢已星星。小樓聽夜雨。昨日海棠花。飄落知幾許。早有私蝦蟆。聒聒草根語。

天平山謁范文正公祠

范公祠屋此山中。石筍抽萌萬笏同。遺像依然窮塞主。義田不改舊家風。歸來散絹三千匹。沒後題碑四五通。近覩天書銀榜在。年年秋色照丹楓。康熙四十四年。御書濟時良相扁懸諸南橋祠有老楓三十本。

由上沙登靈巖山寺有感書壁

溪橋煙柳曉參覃。瑩拂纔過三月三。人自雨中來雨外。路從山北轉山南。遺民老結蓮花社。開士高居燕子龕。茶板粥魚消歇後。空餘井谷上方甘。

胥口

胥口如繩直。吳船比屋高。往來陵雨雪。歌笑涉波濤。淺碧搖新柳。天紅露小桃。近年浮宅慣。未覺此身勞。

讌集張上舍士俊水周林同諸君分韻得人字

岸上牽船思曼。水中築室靈均。客來何者是客。客去此中有人。

石湖

吳下長爲客。舟行不計程。過橋湖水闊。隔岸野雲生。寒食誰溫酒。深村亦賣餻。農人占甲子。最喜上方晴。

高麗蓑歌賦謝納蘭院長揆敘

若稽古。帝伊耆。穿九井。御六螭。百穀旣播。雨露滋。蒸民乃粒。無阻飢。維帝念人壽。之不永。稽首再拜。就泰壹小子而問之。小子前致辭。養生固有道。曷不施赭鞭。鞭百草。嘗其平毒。審其寒懊。烏皓切別君臣。異溼燥。或冬而萌。或夏而槁。豐者莠。蔓者抱。鼎用飪。臼用擣。咬咀三百六十五味。著爲本草經。授諸醫師。俾讎討。山娟娟兮樹濛濛。爰有紫衣童子歌宵中。瑤光之宿。帝車尾。散爲仙卉。三楹五葉。各一叢。人銜鬼蓋。海腴名不同。是爲土地精。肩股各具體。有時黃口兒。土中啼不已。高高羊頭岡。深深虎穴底。立苗團紫雲。結子墮紅米。晉上黨。趙邯鄲。遠而新羅。百濟。根結蟠。我昔於高麗。圖經曾覽觀。胥餘啓宇後。朝鮮世世稱外藩。森羅三千七百島。四至八到提封寬。域中生蓑類羊角。其上椹樹清陰攢。春州產尤嘉。堅白少垢癢。聞諸遼陽土。木搯地。先以熱湯野爐煮。何異都蔗去汁方登盤。此邦之人日炙風戾乾。元氣不損形神完。珍藥豈易得。恆愁致者難。納蘭學士相於久。憶別重逢歲在酉。三面山臨一面江。學士游韜光句也誦君清詩不去口。

今春鳳艦復時巡。扈從依然八十一車後。朝來帳殿喜合併。憫我形枯貌黧醜。分我神草凡百莖。投之几案鏗有聲。五加一把安足道。愛玩不異懷中瓊。服之洗憂恚。定心氣。益神智。還精髓。失笑頗類西域之駱駝。口不能嚼左右齧。老眼秤星渾不辨。刀圭約略付鏗鑷。作詩報學士。奇觚急就有媿盧仝。馬異劉叉何。

過龔御史翔麟田居留飲卽席賦

蘭臺有柱史。敢諫名不虛。奮舌彈將相。收身還里閭。性不愛肥膩。築室田中居。田中何所有。活水清不淤。竹依上番種。瓜撰辰日鉏。十枝五枝花。一寸二寸魚。籬下舴艋舟。門前殼觶車。雖然在城市。俗務已漸疎。交謫無孺人。著錄付小胥。曉督芸鼓芸。宵從漁父漁。我來適孟夏。乍見蓮葉舒。蘆藩打槳入。直前上階除。是日新雨後。泱泱鳴溝渠。一孫扶藜杖。桂孫。二客停笏輿。查編修嗣稟家上舍思贊。主人略禮法。小摘園中蔬。山庖遠羶腥。俊味頗有餘。日長語雜亂。要勿及除書。學稼既有懷。老農豈不如。清詩唐宋間。流傳相歎譽。幽棲洵可樂。奇服遂厥初。試觀襤褸子。有若窮相驢。團圞日旋磨。進退皆牽掣。對此淡蕩人。物外心相於。躬耕許我耦。願言期溷沮。

初夏湖上同佟學士法海賈編修國維查編修慎行嗣稟汎舟學士紀之以詩遂和其韻

新晴最可娛。天朗片雲孤。蓴膩魚王塔。鶯嬌柳浪湖。水亭施步障。風幔結流蘇。今夜弄明月。千金此一壺。

瑪瑙寺陳閣老行館

寶勝湖邊刹。峰連葛嶺青。過橋行殿近。散直小車停。野飯移廚速。山泉入笕聽。只愁宣喚至。容易別巖扃。

武林逢鄭高州梁

高涼太守鬢成絲。青眼看人似舊時。桐樹半生無改色。蟹螯一手尚堅持。後來領袖歸才子。老去雲煙勝畫師。別久重逢轉傾倒。七言三復曉行詩。太守右體不仁。左手猶能作畫。其曉行詩云。野水無橋。率馬渡。曉星如月。照人行。賦景最工。公子性有才名。

飲查編修慎行寓樓二首

顛毛初白與僧同。編修取蘇學士僧臥一菴。初逐隊仍趨朶殿東。恰喜行廚櫻筍熟。繫鞵且對一漁翁。唐

士繫鞵坐玉堂。

高館江湖左右開。三餅樞酒倒官醅。十年舊事篝燈話。此夜方舟泊釣臺。戊寅四月。同編修入閩。

杉青牖別佟學士法海

肥阿題紈扇。灣洄住綵舫。合并曾幾日。相送落帆亭。

曝書亭得孫學士致彌都下札

杖藜還藉短童扶。暇覓筠牀雀糞滂。典籍曝餘翻散亂。田園歸後轉荒蕪。病蔬幾見連筒灌。薄酒生憎入市沽。差喜故人遙記憶。八行書肯報潛夫。

苦旱茗飲乏水戴秀才餞以所蓄天泉見惠率爾賦詩

浮玉山。矐兩目。荆溪橋。斷百瀆。吾家長水口。夏至不沒狗。村農鳴鉦踏水車。有如赴壑之修蛇。青天無雲赤日午。相與結隊撈魚鰕。忽焉長水涸。水車無聲泥上閣。東臯種禾禾漸焦。南山種豆枯。豆苗紫茄黃。瓜半灰朽。安得舊井寒泉澆。朝來約童子。越阡度陌汲湖水。昨行五里今十里。斯時老夫出亦愁。入亦愁。躁類楚沐猴。喘似吳耕牛。既不能喝三江五湖。倏倒流。又不能使龍跳蛟舞。拔老湫。升斗之水何從求。戴生前一言。家有泉兩鑿。須臾擔僕來。打門遽相送。樂莫樂。且先嘗。何減三危之露九醞漿。竹火爐。冰盜怨。鷹觜長。雀舌短。飲罷北牕眠。月輪又新滿。仰面問金波。那不麗天畢。雨滂沱。何辜今之人。忍令禿髮女。城市也來。婆娑。生自柘湖還言。半娥見乍浦。

寄鄭秀才元慶

鄭生五亭住。四面白蘋香。竹樹旱無恙。湖田低不妨。圖書宜後定。天氣欲新涼。近得茗溪集。南渡劉一期。止詩文。君讀草堂。

更舞蛟石爲蛇蟠石紀之以詩并序

府治東徐少卿祠。有苔石奇古。士人目曰舞蛟。傳是花石綱所遺。然至元嘉禾志。明柳琰。鄒衡。趙瀛三志。均不載。未析所從來。按元慈谿黃玠弁山小隱吟錄。有爲濮樂閒司令作蛇蟠石歌。樂閒家濮院。意明初產入官。後好事者移置此地爾。妄擬李白更九子山例。書之禾錄。

石以舞蛟名。未若蛇蟠古。試誦弁山吟。圖經猶可補。

吳甥振武用指頭作畫花竹翎毛草蟲山水畢肖異而賦長歌

軒皇曾列素女圖。虞帝欲觀古人像。禹鑄神姦貢牧金。康模酌酒豐侯相。周官設色之工五。畫繪由來有專尙。彼時蒙恬筆未製。安得中山管城樣。不知渲染用何物。藻火山龍授師匠。指頭作畫舊譜希。巧者未述知者剽。吾家賢甥罷官久。玉桂國中少倚仗。林泉高致頗軼倫。往往得錢埽屏幃。入春放溜始歸來。啜粟承歡北堂養。田園松菊縱荒蕪。且免折腰走俗狀。蕭晨訪我梅會里。小艇恰乘新水漲。開顏並對竹垞竹。一枝尤精難比伉。先施淡墨後濃墨。食指兼需巨擘將。有時爪痕抽藥苗。有時指節成花當。雪禽不數唐希雅。風蝶何殊秦友諒。少焉滌硯寫山水。茅屋苔磯雅清曠。斯須湧出八九峰。瀑布飛流樹穿浪。釘頭鼠尾信手皴。程奕屠希見惆悵。漆園以指喻非指。天地一指巧相況。觀爾新圖捫指成。使我衰年一神王。移家思避消夏灣。歲旱湖田定無恙。角里黎容客至嘗。毛公壇許人扶上。橙黃橘綠及是時。十幅蒲帆趨所向。甥能從我賦近游。共醉山家隔年釀。

南垞晚步同王生滋

荷風剛罷浴。蘭畹已新涼。高樹下歸鳥。小牕明夕陽。蛇牀秋草徧。魚尾暮霞長。老圃論生計。纔收一稜薑。

過李上舍村居

偕行十畝桑外。並坐千年樹根。猗玗子無惡客。武夷君有曾孫。元結自號猗玗子。以不飲酒者為惡客。上舍六十。已得曾孫。

五毒篇效曹通政寅用其首句

南蟲毒頭北蟲尾。以類名蝨總為虫。五者潛行疾如鬼。誰與點筆繪作圖。一一獍劣殊形模。五月五日張戶樞。嗚呼之蟲螫人遇所觸。謀及乃心禍斯酷。世間無如倮蟲毒。

送筵占楊叟還廬江

桐帽櫻鞵冰雪容。山茨歸臥棗香濃。瓊茅欲就靈氛卜。知近浮槎第幾峰。

雨集平山送查編修嗣琛蔡舍人璽方上舍世舉唐明府紹祖入都二十韻

金飈斂行潦。絳葉鳴凜秋。曉雨原上來。枯桑落荒溝。筠車北岡路。徑盡知所投。平山表遺迹。經始歐九修。手移新堂柳。綆汲冽井流。至今闌檻曲。詩版存王劉。吾來堂未建。再至乃登樓。未知百年內。紺塔能復不。一蕭曠二十子。澗久。載酒羅庶羞。征鴻適來賓。鳴鹿迭相求。翩翩羣雅才。簞笠偕燕游。江光湧平楚。草色連遙洲。淮南十一郡。千里極望收。同人齊所願。于野獲良謀。查蔡金閨彥。方唐才士尤。將從畿南驛。直抵山後州。豈曰無裳衣。客子在道周。感彼蟋蟀唱。役車何時休。燕南趙北際。慎勿久滯留。且復飲沉頓。率意成狂謳。

紀夢作

北山叟卜南山宅。言歸北山人不識。山家黑犬兩耳黃。獨木橋邊吠行客。柴門之下水淙淙。枳籬以外花茸茸。偶然鞭犬失青竹。化作羊須一白龍。

送程秀才元愈還宣城

梅孝廉庚女壻也

花飛春水都官句。山抹微雲女壻詩。送子羊頭車一兩。滿林柿葉正紅時。

歲暮送張生星還吳

四野同雲淄淄寒。只應小住共春盤。懷歸潘岳真多事。遺挂重思面壁看。

著雍困敦

五言賦鴨餛飩

禾俗養鴨兒。樂府歌阿子。一雄挾五雌。累百啜長水。方春穀將出。生意不可止。要術啄菹宜。而月雛定起。

淺夫計欲速。火攻迭運徙。半體形已呈。忽焉混沌死。他邦盡棄擲。吾黨獨見喜。鄉人曰喜彈。銅童屑椒桂。竈妾

洗毛髓。色淆黃白斑。候斂漿汁滓。鴨簽晒東京。鴨劓屏南史。既免治刀砧。兼弗齷牙齒。以之號餛飩。莫審

所自始。得非飲食人。桐江方萬里。記取秀州門。竹杖扶入市。萬里竹杖詩。跳上岸來須。至今七十坊。至元嘉禾

志載坊。饌法傳伍氏。物微愛憎殊。留賓姑舍是。二子下箸貪。桐城方世舉。謂足勝羊豕。作詩賞逸味。虛谷

同一揆。不知天地間。何者真好美。試問廚煙生。曾否動食指。

送李上舍之濟南謁新城王尚書

海右惟濟南。具饒山水趣。側坎趵突泉。單椒華不注。匯爲蓮子湖。七橋從坦步。尚書宅新城。道重東山傅。絲竹匪所耽。騷雅乃先務。林端有嘯臺。池北但書庫。著錄幾千人。片言等墳素。李生辭菰蘆。高山動遐慕。譬諸驥騄姿。孫陽宜一顧。莫因籤程迂。直趨九河渡。送行吟短章。心飛蠶尾樹。蠶尾山房。尚書著書室也。

九日籬菊未放桂有餘花里中諸子過出金華酒小飲分韻得小字

叢桂落餘花。雙餅出清醪。我客不速來。毋論戶大小。冷笑登高人。牽拂風林杪。

潘檢討未以方竹杖見贈賦謝

天台方竹杖。絕勝萬年藤。九節仙人斲。兼程衲子能。免尋籃輿坐。且喜石橋登。準擬池南岸。晨朝相菊塍。

德藏寺咏古跡五首

雙塔

寺門雙塔並。夕照挂林西。影落東湖曲。參差終不齊。

梓徑

入寺一徑分。文梓昔無數。想見獨吟人。赤腳踏紅雨。趙王孫孟堅有詩。

浦花堂

百里魯公浦。風荷岸岸香。金沙誰布地。傳是道宣房。

松風臺

松樹已無榦。松風舊有臺。華亭初不遠。定有鶴飛來。

山月池

海山一片月。終古照池水。當年人定鐘。聲聞十八里。事見魯應龍閒聽括異志

天游觀歌寄贈崇安王明府梓

昔我登武夷。勝絕天游觀。諸峰羅鳥下。一亭表天半。水紋斷續流。石骨陰陽判。藥鑪茗盃不外求。谷鳥林猿迭相喚。老夫高尋豁兩眸。坐久嬾下崎嶇丘。夕陽滿樹嵐翠浮。白雲忽起山之幽。須臾逢逢漲巖壑。仰視昂車井鉞參旗收。恍如置我不繫之虛舟。蓬萊方丈海外州。天雞乍唱旭日旦。依舊列岫仍環周。回思此地神物怪疑詎可測。願爲道士驂駕白鹿騎青牛。年今八十行歎復坐愁。安得九節竹杖扶我重上仙。掌之峰頭閒吹鐵篴弄明月。乾魚糲飯長勾留。邵陽王子今爲宰。詩思潘江文陸海。仙才自合治仙山。一鶴一琴恆並載。權歌九曲和元音。逸韻清鏘音欵乃。書院琳官次第新。陳丹暗粉更番改。畫簾暇日考圖經。祠祿題名舊章在。騷人初度先春期。玉梅早發珊瑚枝。邑人躋堂齊介眉。頌侯戩穀無不宜。三漿十酒斟滿卮。亦有鼓板兼歌師。當筵漫奏賓雲曲。明府自有白雪陽春辭。

查二編修弟嗣。栗煎錫爲洗頭盆。注水扶寸。江行恆自隨。乃以脫贈賦。五言詩紀事。
查仲華山頂。曾窺玉女牕。洗頭無俗具。注水愛深缸。巧匠工煎錫。騷人利涉江。塵容許三沐。贈我載歸艤。

題盛叟生壙

宜山居士抱詩癖。老傍南湖度幽宅。莫嫌丙舍少兒孫。且免他時賣松柏。

題張平山水墨明妃出塞圖

畫師徧寫春風面。殺粉研朱總未嫻。似此澹描翻絕世。按圖誰復詆平山。



曝書亭集卷第二十三

古今詩二十二

屠維赤奮若

寄查山張上舍二首

昔訪查山麓。梅花香滿頭。筠車三日坐。日日醉層樓。八載負前諾。今年春可游。老夫無那嬾。風雨返孤舟。傳說幽栖好。經營與舊殊。立碑先墓側。注水小山隅。路近通香海。帆輕截太湖。不知熨斗柄。更插幾千株。

送施生重游武夷三首

止止菴深舊下帷。焙茶擣紙遠如期。春山一路無啼鳥。澗水聲中到武夷。

度嶺虹橋架壑舟。無妨仙侶暇重游。修琴載酒途非遠。誰道山中不可留。

隱屏峰後石蒼黔。百丈傳聞挂水簾。好事畊漁曾不到。圖經藉爾後游添。吳人徐達左。洪武中游武夷。繪九曲之勝。不及水簾洞。畊漁子。

達左自號也。

雨

曉雨仍鳴瓦。春陰未浴蠶。乍看抽菜甲。翻覺斂花苔。窮鳥窺檐入。枯魚得米泔。此離愁雁戶。泥滑市西南。

卽事二首并序

入春菽麥未熟。饑民載塗。告于太守。諗諸比鄰。各率私錢。爲粥以食餓者。日萬餘人。俄而謗書滿紙。無由自白。乃有落瓜里民。就食經月。以農務告歸。持瓣香踵門稱謝。紀之以詩。

惻隱人心共。何期物論殊。螳螂齊挾斧。薏苡乃成珠。捷捷謀宵雅。申申冒左徒。角張逢五六。作事哂今吾。世事翻成覆。人言僞亂真。不圖落瓜里。乃有翳桑人。布穀迎新雨。收蠶及暮春。要知升斗水。也足潤頰鱗。

野老

學易村夫子。勞勞方寸心。卜錢求漢鑄。新得火珠林。

柬友人

吾圖吾書。筭鑰則無。與子忘形。點勘墨朱。期我故人。無失其故。乾餼以愆。將子無怒。勿躬勿親。聆我詆謔。人或迂汝。胡詛我爲。子毋居居。子毋究究。雖有新知。人惟求舊。爾雅注。毛傳。居居。懷惡不相親比。之貌。孫炎曰。究究。窮極人之惡。

三月十日詔下青宮再建喜而賦詩

震驚由地奮。巽命自天申。復覩重光日。毋煩四老人。堂懸銀榜舊。笥出紵衣新。媿遠青雲路。難揚蹈舞塵。

四月八日效長慶體

今年孟夏行冬令。夜尙南風曉北風。露頂劇憐黃面佛。披裘仍作鹿皮翁。榆錢柳絮愁飄損。且喜餘花婪

尾紅。

題曹通政寅思仲軒詩卷

蕪城鮑明遠。古調李騫期。眷念同懷子。因題思仲詩。春塘宜入夢。柔木易生枝。更放過牆竹。濃陰使院垂。
公弟居此。植杜仲一本。于庭。故以名軒。

爲殷秀才譽慶題梅孝廉庚春雨幽居圖

飛梁苔滑滑。平楚風修修。如何仙源水。不有桃花流。

題程上舍鳴寒梅霽雪圖

自寫苔枝竹外。雪晴半樹梅花。此地不攜小酌。明朝風起如何。

眞州客舍對雨

夏日北風起。殷雷聞再三。黑雲奔萬馬。俄頃徧天南。驟雨散銀竹。乖龍回碧潭。何來雙白鳥。猶自舞毵毵。

魏諭德學誠調鶴圖

蔚州才子嗣清塵。藻鑒持衡識曲眞。畫裏歸裝無長物。一雙舞鶴比長人。

項叟小像

花開一百五日。月明二十四橋。君家大好山水。偏愛蒲團寂寥。

五月晦曹通政寅招同李大理煦李都運斯佳納涼天池水榭卽席送大理還蘇州
天池南有樓。天池北有樓。納言北樓下。招我池上游。軒牕拓四面。地潔無癥疣。解衣挂短桁。舍坐臨清流。
綠楊萬千絲。花鴨六七頭。徐聞水車響。少待魚罾收。須臾二李至。各各情綢繆。小胥搖大扇。四座風修修。
蘭肴屏肥膩。苦露獲所求。古來避暑飲。豈必量觥籌。東園久不雨。老樹焦煙浮。青蟲高下墮。吐絲若綴旒。
斯時墨雲升。或躍在淵蚪。因之鳴埴鶴。且免喘吳牛。有滄雖不作。氣已如涼秋。大理起避席。疊櫂還武丘。
主人不忍別。小舫尾中洲。峭帆十八幅。破浪同飛鯨。榜人有常程。歧路難久留。分手文山祠。日暝回孤舟。

守風瓜步示沈秀才翼二首

連檣水沉鐵鹿。四面風吹石尤。東澤曾留綺語。請看月上瓜洲。
朝霞欲雨不雨。歸路愁水愁風。長江廣輪尋尺。此事何關釣翁。

丹陽道中

丹陽三里城。兩槳一舟行。雞犬家家靜。菰蒲岸岸生。過橋斜照斂。出郭小車鳴。不比瓜洲渡。波潮信宿驚。

載

化益作將軍。百蟲各率職。周官去蠹黽。庶蠱攻必力。苟或害田功。惡其傷稼穡。食苗心曰螟。食苗葉曰貳。
食苗根曰蠹。食苗節曰蟹。秉畀炎火焚。田祖首罰殛。嗟載本末微。坏戶易潛匿。花兒匠太慵。掃除失記憶。

主人五畝園。曝書亭在北。樹之桃李梅。三面少柴棘。履道坦且幽。穿徑曲而仄。薰風來自南。綠陰淨如拭。睨皖黃鳥音。繽翻翠禽翼。藻景愛靜觀。悠然意獨得。不意蟄者蘇。鬪生累千箇。縹碧黃朱斑。文采假緣飾。依倚族類繁。黨附蛄蜚蠹。誦詩三百人。其名或未識。上樹少卻行。緣裳無懼色。一毛散空際。中者立受厄。小兒女至頑。敢怒不敢卽。傳聞官蝦蟆。噓氣出胸臆。之蟲在林梢。蠢動自顛踣。又聞小花鷹。飛掠來海國。慣伺之蟲嘗。不避弋人弋。二者均莫致。俾爾橫暴極。桑柘以飢蠶。村姑有定則。賦茅自狙公。朝暮稟部勒。豈若是物貪。葉葉乃盡蝕。有若人禿鬻。又如鳥希革。歧枝結棼絲。遺矢類深墨。大哉造化工。生物固不測。巨或肆饕餮。小亦具凶德。荀卿原性惡。斯言信剛直。歲序迭環周。時運互通塞。商飈一以涼。流毒自然息。

贈吳下張生星

一道蓮涇直到門。粥魚茶版共晨昏。郎官石柱書無敵。甘白先生里尙存。五載匡廬曾結社。全家曇壤近成村。看君用筆形交讓。足比西京繆篆痕。

檇李

佳果先秋熟。來禽也不如。瑤光珠斗散。青簡素王書。瘦地翻宜嫁。柔條亦易舒。最防黃霧塞。務使綠陰疎。暑暘漿偏潤。風吹粉末除。豐肌須小摘。纖核乃中虛。銷夏吾鄉好。分甘佛寺初。曾留西子搗。當食轉憐渠。查編修弟嗣琛家上舍思贊書來許以七夕見過愆期不至漫賦

星期逾七夕。露坐判三更。河漢夜無影。梧桐秋有聲。愁嫌樺燭短。涼覺苧衣輕。可是烏巾酒。連船載不成。

蟋蟀二首

暑退陰蟲健。無端處處吟。起看河射角。坐久院橫參。易入羈人耳。潛驚嬾婦心。物微甘在野。何用苦追尋。已被村童拾。寧容古礎藏。呈能矜小勇。作氣恃方剛。寸草心挑戰。千錢注看場。冷盆宮樣巧。制器自宣皇。

送徐甥焯之豫章三首

涪翁詩派授諸甥。中有師川調更清。我亦南州矜宅相。雁池賦雪早知名。西江詩派山

繡鴨灘頭水滿磯。豫章西去一帆飛。心傷慈母停鍼線。臨發誰縫九月衣。谷甥居其四

南浦停舟霧雨迷。登臨兩度倦留題。風流輸爾秋屏閣。簾幙看山盡捲西。

社日送燕和查編修嗣燠

好去炎州燕。高秋別翠樵。舊巢非不戀。社鼓最愁聽。寄訊誰書札。翻飛幾驛亭。自今諸怯薛。恣放海東青。

村夜

山昏月未明。木落霜初降。何處夜歸人。一犬吠深巷。

顧孝廉嗣立過訪村居即席懷汪泰來郭元鈺二徵士二首

鑑曲歸狂客。高陽命酒徒。披緜黃雀賦。入手紫螯麈。道遠資雙屐。孝廉將宵長判百瓢。新詩喜同調。端可

傲江河。

歛郡汪文學。江都郭秀才。圭璋宜特達。時命乃遭迴。喪子憐東野。留賓少上台。合并愁未得。與子且銜杯。



國家圖書館



004758671

